

Baraen Douk Jisas Krais Nakrip Jon-enyi Banenyi Baraen Um Enenyenjen Jisas Krais Neyabig Jon Um

- 1:1-8 Jon kabi nanabek yomnis um aria natik eneshenesh eshudok aria nowem enyudok baraen 7-poreis awiros um Iruhin ananish arpesh aria natuk Jisas Krais ananin nyeigur nyato iruhw.
- 1:9–3:22 Jon natik Jisas Krais natrugun abom aria ananin baraan nyanam eshesh sabaishi Kristen shape 7-poreirub warub iri.
- 4:1-8:1 Jon natik iruhw heven aria natik Jisas Krais nani ananin Yaken Iruhin, hani sabaishi enselahos aria natik Jisas nakweshih 7-poreis kendelis gris douk soweshik apudok shup douk shadareshap iri.
- 8:2-11:19 Jon natik 7-poreish enselahos atin atin shasuhw aruruh aria shahaprisharuh
- 12:1-13:18 Satan ta nini Iruhin ananish sabaishi enselahos shurpak aria shuiyahan nugruki agundok atap
- 14:1-15:8 Jon natik Jisas natogur kabi douk nugaen sipsip um aria nani bishatin enselahos shabo eshudok arpesh douk shakon agabus abom Iruhin iri
- 16:1-21 Jon natik enesh kupaishi 7-poreish en-

- selahos. Eshesh atin atin shasuhw marus.
 17:1-19:21 Iruhin ta nuwanamesh yoweishi
 inahos eshudok arpesh shape wabur Babilon
 shenekesh iri, aria Krais ta nutogur kabi
 douk arman netem shigorihwinyi hos um
 aria nunaki.
 20:1-15 Satan ta nunuweshik nupeik namu-
 dok agudok gagari nuwag gabuh gani atap
 iri nuwag aria Iruhin ta nunek skelimaguk
 ihishmorim arpesh ba iyoh
 21:1-27 Namuburi wabur Jerusalem
 22:1-6 Worubibar abar bani shuruwepigos
 rowos douk ta arpesh shishoh aria shupe
 wosik abom ihih nyumneh iri.
 22:7-21 Jisas Krais ananin nyatuh iri baraen
 douk nahwar sabaishi arpesh um shunaku-
 mori anan.

*Baraen Jon Nenyem Nyakri Um Okwudok Buk
 Iri*

¹ Seiwok enyudok baraen um Jisas Krais nyan-
 abeshuk. Aria douk abudok nyutob enyen ny-
 atogur yopugunum. Iruhin douk nakon enyu-
 dok baraen Jisas um nukrip shenek Iruhin
 ananin mour iri um nuyabigesh um shanabeshuk
 iri eshudok eneshenesh hurukatin um shuto-
 gur. Anan douk neyabigap namudok. Anan
 neshopoki ananin ensel nyanakumori eik Jon
 douk yenek Iruhin ananin mour iri aria nyakripe
 enyudok baraen. ² Aria eik yatik eshudok
 ihishmorim eneshenesh jurug aria eik yawereh

enyudok baraen yakripep yopugunum. Enyudok baraen douk Iruhin ananin nyani enyudok adurin baraen Jisas Krais nakripepenyi.

³ Enyudok baraen nyetem okwudok buk iri douk nyakrium eshudok douk ta shutograri iri. Aria ihishmorim arpesh douk shutarih enyudok baraen debeg um kupaishi shumneken iri, eshesch wosik shanadudareh. Aria eshudok douk shumneken aria shusuhwen dodog shugipeshen iri eshesch shopunek douk shanadudareh. Um maresh? Abudok nyutob um eshudok ihishmorim shutogurum douk banaki hurukatin.

*Baraen Jon Nenyem Nyunam Iruhin Ananish
Arpesh Shape 7-poreirub Warub Iri*

⁴⁻⁵ O ipak Iruhin ananishi arpesh pape arbudok 7-poreirub warub douk bape shokugi nahobig Esia iri. Eik Jon yenekumepogu apudok shup ipak. Eik yakri Iruhin douk seiwok nape, aria kweipon shopunek ta nupe arigaha hugiguk iri nyumnah hutograri nutaurumep meyoh. Aria anan nutaurumep pupe dodogowip aria ipakiruh aparuh hur wosik. Aria shopunek, yakri eshudok 7-poreish yopishi mishish* douk shape hurukatin um Iruhin ananin debeinyi wagitur iri shuni Jisas Krais shopunek shutaurumep meyoh aria ipakiruh aparuh hur wosik. Jisas Krais douk neyotu dodogowin atun nagipesh ananin baraen wosik iri nakripep ihinymorim Iruhin ananin adurin atinyi yopinyi abom baraen. Aria sagomatin Iruhin narik nohur anan nakutukuk

* **1:4-5:** Enesh shakri eshudok 7-poreish yopishi mishish douk shakri um Iruhin ananin Mishin.

wonugwehw aria watak nakitak nape. Aria anan douk abom nape debeini um ihm-morim debeimi king douk hape agundok atap iri.

Anan douk urkum manawashamap aria ananibor owishibor botourak babuh aria bokweshi-hap aria mape wosik um eneshenesh apakish yoweishi inahos.⁶ Aria douk anan nenekap mape debeipi um sabaishi arpesh kabi douk king-omi um. Aria shopunek, anan nenekap mape pris kabi amam seiwok hape henek ofa um eneshenesh eshudok hako Iruhin iri um. Aria apak munek mour um Iruhin douk Jisas Krais nene lotuman iri. Aria anan shopunek douk ananin Yain. Aria eik yakri debeinyi nyeigur nyuni ihinyumorim dodog abom shupeum anan atun ihih nyumneh! Adur atin.

⁷ Ipak tik! Anan ta nini orug nunaki. Aria ihmishmorim arpesh shuni eshudok douk seiwok shan nagok iri ta shutrun eshesis nabes. Aria ihmismorim debeisi awirosish arpesh douk shape agundok atap iri ta shurepan abom. Adur atin eshudok ta shutogur namudok atin. Adur atin.

⁸ Aria debeini dodogowini abom Iruhin douk seiwok nape, aria douk shopunek nape, aria kweipon ta nunaki iri nakri namudok, “Seiwok baugos um ihmishmorim eneshenesh eshudok watak enesh shupe uwe aria eik yarig yape. Aria kweipon shopunek, abudok nyutob ihmishmorim eshudok shunak shutuhuk um eik ta ipe.”

*Jon Natik Krais Douk Iruhin Nagraehan
Neshopokan Nanaki Iri*

⁹ Eik ipakin ashuken Jon douk yani ipak munoprom Jisas atun iri. Eik douk yani ipak memnek eriger aria meyotu dodogowip um musah enenyenen amaen douk ta nyutogrumap iri. Aria douk shopunek, eik ta ini ipak um muwish agundok Iruhin nepe Debeini um ananish arpesh um. Eik douk yakripes Iruhin ananin baraen nyani enyudok adurin atinyi baraen um Jisas. Douk namudok aria eshesh shasuhwe sharawe shanaki sheyosop yapeik enyudok unai nyeigurinyum Patmos iri. ¹⁰ Anah nyumnah douk apak apa mape munek lotu um Debeini ahi, Iruhin ananin Mishin nyatogrume dodogowin atin aria nyeyabige eshudok yatrish kabi yabo yomnis yatrish um. Aria yemnek anah debeihi mah agabiwe um kabi douk shahapur oruhw um. ¹¹ Aria enyudok arpen nyeyagwrehi iri nyakripe nyakri, “Nyak wem eshudok douk ta nyutrish iri anap shup aria nyukeshop punak um Iruhin ananish arpesh shape arbudok 7-poreirub warub iri. Nyeiguhwirub um warub douk arbudok. Efesus, Smerna, Pergamum, Taiataira, Sardis buni Filadelfia iri Laodisia.”

¹² Aria eik yatanam um itik enyudok douk nyakripe enyudok baraen iri aria yatik 7-poreish eshudok shenekesh gol iri shatao. Eshesh douk shenekesh um showem lamhos shetem um. ¹³ Aria anan arman neyotu orokohun um eshudok 7-poreish shenekesh gol iri. Anan nor anah rouhi rupah habuh heyawiamokuk ananiruh yeriweruh aria nawashak anat let douk shenekat gol iri um ananin mishin. Anan douk kabi Anudok Arman douk natogur adurinyi arpen iri

um. ¹⁴ Aria ananig barag douk gatogur shigorihwig abom kabi ehirub douk batogur sipsip iri o kabi shigorihwisi ais um. Aria ananis nabes satrugun kabi douk debeihi nyih hanu aria bogaragun um. ¹⁵ Aria ananiruh yeriweruh hatrugun abom kabi enyudok brasin kapa iri um douk shashainyeh debeihi nyih aria nyatrugun um. Aria ananih mah heyagwreh debeg kabi worub batogur banaki um. ¹⁶ Anan nasuhw 7-poreiyu unib um ananin yopunyi rogur, aria anat wanohwiti bainat douk wanohwit eresit wobuwobur iri tatograri ananit nokwat. Aria ananig yamag bogagrag abom kabi wah hatao nyumnah iri hatrugun um.

¹⁷ Douk yatrun aria yanak yabuh yakus hrukatin um ananiruh yeriweruh kabi anan nagok iri arman um. Aria anan nowem ananin yopunyi rogur eik aria nakripe nakri, “Nyak mare nyunogugur, uwok! Eik douk seiwok baugos um ihishmorim eneshenesh eshudok watak enesh shupe uwe aria eik yarig yape. Aria kweipon shopunek abudok nyutob ihishmorim eshudok shunak shutuhuk um, eik ta ipe. ¹⁸ Eik douk madae igok iri uwe, uwok. Eik yape iri! Seiwok yagok aria douk yape, aria shopunek ta ipe ihih nyumneh. Aria eik douk yarao debeinyi big aria dodog um ipe debeiwe iri um agundok arpesh shugok um. Um ikri eshesh shunak um yoweiburi wabur o shunak um yopuburi.

¹⁹ Douk namudok aria nyak wem eshudok iganigadae nyatrish iri shuni eshudok douk shape shatogur agundok atap iri shuni eshudok douk ta kweipon shugiguk shutograri iri

nyakip shup. ²⁰ Aria baugenyum baraen riguk nyanabeshuk um oudok 7-poreiyu unib douk nyatik yasuhwo eikin yopunyi rogur iri douk namudok. Oudok unib douk wagraeh um 7-poreish enselahos douk shape sheyoh Iruhin ananish arpesh shape arbudok 7-poreirub warub iri. Aria baugenyum baraen um eshudok 7-poreish shenekesh gol iri um shuwem lamhos um douk nyakrium Iruhin ananish arpesh douk shape arbudok 7-poreirub warub iri.”

2

Baraen Nyanak um Iruhin Ananish Arpesh Shape Efesus Iri

¹ Aria Jisas ta apa nakripe nakri, “Jon, nyak wemen enyudok baraen anap shup nyunak um enyudok ensel douk nyape nyeyoh Iruhin ananish arpesh shape Efesus iri. Eik Jisas eikin baraen douk enyudok. ‘Eik douk yasuhw 7-poreiyu unib eikin yopunyi rogur aria yape yarahaen orokohun um 7-poreish eshudok douk shenekesh gol iri um shape showem lamhosum iri yenekumepogu enyudok baraen ipak. ² Eik yadukemep um ihihmorim aih hani enyudok debeinyi mour ipak pape peneken iri. Aria yadukemep um agundok peyotu dodogowip atip um enenyenen amaen douk nyatogrumeip iri. Aria ipak pakri uwok abom um eshudok shenek yoweihai aih iri arpesh. Aria shopunek, yadukemep um ipak douk pokwiraeh amudok armam douk henek rohw hakri amam douk aposel douk hakripesh Iruhin ananin baraen iri. Aria ipak padukemam

um amam douk madae aposel omi uwe, uwok. Amam douk henek rohwumesh iri. ³ Aria shopunek, eik yadukemep um agundok arpesh shatrip um pasuhw eikin barae pagipeshen um aria shenek yoweishi aih um ipak um. Aria ipak peyotu dodogowip aria madae juwehosip uwe. Aria shopunek, eik yadukemep um ipak douk madae arigeh hep um punek enyudok debeinyi mour um pugipesh eik um uwe, uwok. Ipak peyotu dodogowip atip.

⁴ Aria douk eik yakri ikripep enen barae um eshudok yoweishi inahos douk ipak pape penekesh iri. Sagomatin ipak urkwip panawashame dodog abom aria pagipeshe. Aria douk uwok. ⁵ Aria eik yakri ipak urkwip purum agundok riguk ipak papeum. Sagomatin ipak pape wosik, aria douk ipak patu pagrukuk rougunum. Ipak urkwip douk madae punawashame dodog uwe, uwok. Aria douk eik yakri ipak ta pukutukuk ipakish yoweishi inahos aria watak putanam puke aparuh eik. Aria ipak urkwip punawashame dodog abom kabi sagomatin ipak urkwip panawashame um. Uwok um, eik ta inaku itukuk ipakin enyudok douk shape showem lam um agundok douk enyen nyape nyataum. ⁶ Aria douk ipak watak panasuhw ehudok yopihi aih abom um pakri uwok um ehudok aih douk apudok awirop douk shanahwar um Nikolas* iri shenekesh iri. Eik

* ^{2:6:} Apudok awirop Nikolas apa shani eshesh Kristen shape Efesus bani Pergamum iri shape shenek lotu. Aria eshesh apa shenek skulumesh um shunek eneshenesh yoweishi inahos.

shopunek douk yakri um uwok abom.

⁷ Aria douk ipak arigos sapenyep iri ta pumnek enyudok baraen Iruhin ananin Mishin nyakrip ananish arpesh-enyi aria pusuwen dodog pugipeshen! Eshudok arpesh douk shiyotu dodogowish atish shunek wanohw shubo yoweinyi nyubuhuk iri, eik ta ikesh yopinyi big um eshesh shuwok epudok shurkwip douk peir enyudok rowog douk nyatao Iruhin ananig nahobig ganahwar um Paradais iri. Aria eshudok arpesh shuwok epudok shurkwip iri ta shupe wosik abom iih nyumneh.’”

*Baraen Nyanak Um Iruhin Ananish Arpesh
Shape Smerna Iri*

⁸ Aria Jisas watak shopunek nakripe nakri, “Jon, nyak wem enyudok baraen anap shup nyunak um enyudok ensel douk nyape nyeyoh Iruhin ananish arpesh shape Smerna iri. Eik Jisas eikin baraen douk enyudok. ‘Seiwok baugos um, ihishmorim eneshenesh eshudok watak enesh shupe uwe aria eik yape. Aria kweipon shopunek, abudok nyutob ihishmorim eshudok shunak shutuhuk um, eik ta ipe. Douk seiwok shae yagok aria douk watak yakitak yape. ⁹ Eik douk yadukemesh um enenyenen amaen douk nyatogur um ipak iri. Aria shopunek, yadukemesh um ipak eneshenesh eshudok wokep. Aria uwok. Ipak douk pogrem sabaishi yopishi eneshenesh eshudok shakusumep iruhw heven. Aria eik douk yadukemesh um enyudok yoweinyi baraen douk eshudok arpesh douk shenek rohwumep shakripen iri. Eshesh shakri eshesh douk

Juda aria eshesh madae Juda abom uwe, uwok. Eshesh douk Satan ananish. ¹⁰ Aria ipak mare punogugur um enenyenen amaen douk ta nyutogrume paria nyunekep pumnek debeiri eriger iri. Ipak pumnek! Satan ta nunek anep punak punuweshik pupe um nukwiraehed punek yoweishi inahos. Aria ipak ta pumnek eriger banab nyutob meyoh kabi 10-poreih nyumneh meyoh um. Douk enesh shukri shep pugok um, ipak ta pusuhw eikin yopinyi baraen dodog aria piyotu dodogowip atip. Aria eik ta ituk ipakish nyeiguhw shuto iruhw aria ta inekep pupe wosik ihih nyumneh. Eik ta itaurumep pupe wosik.

¹¹ Aria douk ipak arigos sapenyep iri ta pumnek enyudok baraen douk Iruhin ananin Mishin nyakrip ananish arpesh enyi aria pusuwen dodog pugipeshen! Eshudok arpesh douk shiyotu dodogowish atish shunek wanohw shubo yoweishi inahos shubuhuk aria eshesh ta mare shugok anah shopunek,[†] uwok.’”

Baraen Nyanak Um Iruhin Ananish Arpesh Shape Pergamum Iri

¹²⁻¹³ Aria Jisas nakripe shopunek nakri, “Jon, nyak wem enyudok baraen anap shup nyunak um enyudok ensel douk nyape nyeyoh Iruhin ananish arpesh shape Pergamum iri. Eik Jisas eikin baraen douk enyudok. ‘Eik douk yasuhw atudok wanohwiti bainat douk wanohwit wobuwobur iri yenekumep-ogu enyudok baraen ipak.

[†] **2:11:** Jisas watak nutanamori ahi, shagok iri ta watak shukitak aria shiyotu um kwot. Aria eshudok douk madae shunek bilip iri uwe ta shunak um yoweiburi wabur aria ta shugok anah shopunek.

Eik douk yadukemesh um ipakibur wabur. Satan douk nepe debeini um ipakibur wabur. Aria eik yadukemep um ipak pasuhw eikin baraen dodog pagipesh eik atuwe. Aria eshesh shabo anudok yopuni arman Antipas douk nasuhw eikin baraen dodog abom nakripeshen iri nagok ipakibur wabur douk Satan napenyabur. Aria abudok nyutob eshesh shan nagok um, ipak shopunek peyotu dodogowip aria madae pukri punyukur-ukuk eikin baraen uwe, uwok.

¹⁴ Aria douk eik yakri ikritep enen baraen ipak um enesh yoweishi inahos douk ipak pape penekesh iri. Ipak anep douk wata pasuh-weh dodog ehudok Balam ananih yoweishi aih. Ananih aih douk ehudok. Seiwok anan neyabig-an ehudok yoweishi aih Balak aria Balak nene-rohw um eshesh Israel shenek yoweishi inahos um shakonuguk agabus Iruhin. Balak douk nakripesha shawok eshudok mahish iri wori-gun douk sharik shenek ofamesh shako amudok madae adurimi god omi iri uwe. Aria shop-unek, nakripesha shenek wehrur um. ¹⁵⁻¹⁶ Aria douk shopunek namudok atin. Ipak anep douk pasuhw ehudok yoweishi aih ehudok apudok awiropish arpesh shahwaresh um Nikolas[‡] iri esheshih. Douk namudok aria ipak ta pukeshuk agabus yoweishi inahos ipak pape penekesh iri aria watak putanam pukon aparuh Iruhin. Uwok um, eik ta hurukatin um inaku aria ini eshudok douk shagipesh ehudok eshesh Nikolas esheshih aih iri murpak. Aria ta ikumesh atudok bainat

[‡] **2:15-16:** Putik futnot nyape Revelesen 2:6 iri.

douk tatograri eikit nokwat iri. ¹⁷ Aria douk ipak arigos sapenyep iri ta pumnek enyudok baraen Iruhin ananin Mishin nyakrip ananish arpesh-nyyi aria pusuwen dodog pugipeshen! Eshudok arpesh douk shiyotu dologowish atish shunek wanohw shubo yoweishi inahos shubuhuk iri, kweipon eik ta ikesh anagun worigun douk shawaragun um mana douk nyanabeshuk nyakus iri. Aria shopunek, eik ta iwem esheshish namushi nyeiguhw anabor shigorihiwi-bori utabor aria ta ikesh aburdok utabor eshesh atin atin. Aria kupaishi arpesh ta mare shudukem eshudok namushi nyeiguhw, uwok. Eshudok douk sharao aburdok utabor iri atish ta shudukemesh.’”

*Baraen Nyanak Um Iruhin Ananish Arpesh
Shape Taiataira Iri*

¹⁸ Aria Jisas nakripe nakri, “Jon, nyak wem enyudok baraen anap shup punak um enyudok ensel douk nyape nyataurum Iruhin ananish arpesh shape Taiataira iri. Eik Jisas eikin baraen douk enyudok. Eik Iruhin ananin nunganin douk eikis nabes satrugun kabi debeihi nyih hanu aria bogaragun um. Aria eikiruh yeriweruh hatrugun kabi enyudok bras kapa douk shishainyeh debeihi nyih iri nyatrugun um. Eik yenekumepogu enyudok baraen ipak.

¹⁹ Eik yadukem ehudok yopihi aih ipak pape penekeh iri um agundok ipak urkwip panawasham Iruhin nani kupaishi arpesh um. Aria pasuhw eikin baraen dodog pagipeshen aria douk penek yopinyi mour um putaurum sabaishi arpesh um. Aria shopunek, ipak peyotu dologowip atip abudok nyutob amaen

nyatogrumep um. Aria eik yadukemesh um ehudok yopihi aih douk ipak pape penekeh iri douk heshagrakuk ehudok yopihi aih riguk ipak parik penekeh iri.

²⁰ Aria douk eik yakri ikripep enen baraen um eshudok yoweishi inahos douk ipak pape penekesh iri. Ipakish yoweishi inahos douk eshudok. Ipak pakri wosik aria pape patruk meyoh okwudok yoweikwi armatok Jesebel aria okwok douk kwani ipak kwape. Okwok douk kwenek rohw kwakri okwok douk onok profet douk kwakripesh Iruhin ananin baraen iri. Aria okwok douk kwenek rohw iri. Okwok kwenek rohw um eshudok shenek eikin mour iri kwakripesh shenek wehrur um. Aria shopunek, shawok agundok worigun douk shenek ofamogun um amudok madae adurimi god omi iri uwe. ²¹ Aria eik douk yakutukuk kwape anah nyumneh shopunek um yakri kwukeshuk agab okwokwish yoweishi inahos um agundok kwani kupaishi shenek wehrur um. Aria yakri watak kwutanam kwunakumori eik, aria uwok. ²² Douk namudok aria eik ta inekok kwishuh kwutuwata-gun um kwumnek debeiri eriger. Aria ta eshudok arpesh douk shani okwok shenek wehrur iri mare shukeshuk agabus esheshish yoweishi inahos aria shatanam shunakumori eik um, eik ta inekesh namudok. Eik ta inekesh shumnek debeiri eriger abom. ²³ Aria shopunek, eik ta ibo eshudok douk shagipesh okwokwin baraen iri shugok. Eik ta inekesh namudok aria ihishmorim Iruhin ananish arpesh ta shudukemesh shukri eik douk yadukemesh wosik abom um ihishmorim arpesh esheshish mishish aria aparuh shor shanak um.

Aria eik ta iwanamep eneshenesh wosikumep atin atin um ihihmorim aih ipak pape penekah iri.

²⁴ Aria douk eik yakri ikrip ipak anep douk pape Taiataira iri. Ipak madae pugipesh enyudok okwokwin yoweinyi baraen uwe. Aria shopunek, ipak madae pugipesh ehudok aih douk enesh kupaishi shahwareh shakri, “Satan ananih aih douk hanabeshuk atin abom iri.” Aria eik ta mare watak ikripep enen kupainyi baraen shopunek um ipak pugipeshen iri, uwok. ²⁵ Aria eik yakri ipak ta pusuhw ehudok ihihmori yopih aih iri baraen douk ipak paraen iri. Aria piyotu dodogowip atip arigaha eik watak itanamori.

²⁶⁻²⁷ Aria eshudok arpesh douk shugipesh eikim urkum aria shiyotu dodogowish atish shunek wanohw shubo yoweishi inahos shubuhuk arigaha esheshib nyutob um shugok um butogur um, eik ta inekesh namudok. Eik ta ikesh debeishi dodogowishi nyeiguhw um shupe debeishi um sabaishi arpesh douk shape ihigos nahobigos iri. Aria eshesh ta shupe debeishi shusuhw merikw-umesh namudok atin kabi douk seiwok eikin Yain neke debeinyi nyeigur aria yape debeiwe iri yasuhw merik um sabaishi arpesh um. Enyudok ta nyutogur kabi Iruhin ananin baraen douk nyetem ananik Buk iri nyakrium. Iruhin nakri namudok, “Anan ta nupe dodogowin atun abom aria ta nusuhw anam ainim butum aria nupe nusuhw merikw-umesh. Anan ta nunekesh kabi anan arman douk nawor marus shenekas amnab iri pupuwaros shokugun atugun um.”

²⁸ Aria eik ta ikesh okwudok unuk douk kwanahwar um shuduwi iri. ²⁹ Aria douk ipak

arigas sapenyep iri ta pumnek enyudok baraen Iruhin ananin Mishin nyakrip ananish arpesh-enyi aria pusuwen dodog pugipeshen!” ”

3

Baraen Nyanak Um Iruhin Ananish Arpesh Shape Sardis Iri

¹ Aria Jisas nakripe nakri, “Jon, nyak wem enyudok baraen anap shup nyunak um enyudok ensel douk nyape nyeyoh Iruhin ananish arpesh shape Sardis iri. Eik Jisas eikin baraen douk enyudok. ‘Eik douk yasuhw Iruhin ananish 7-poreish yopishi mishish* shani 7-poreiyu unib aria yenekumep-ogu enyudok baraen ipak.

Eik douk yadukemesh um ihihmorim eneheneh aih ipak pape penekeh iri. Arpesh shatrip um, eshesh shakri ipak madae pugok iri uwe. Aria uwok, ipak nubokadae pagok iyoh.

² Douk namudok aria ipak pikitak pukutukuk agundok ipak peshuh um. Aria ihihmorim ipakih yopihi aih douk ipak wata pasuweh iri, eheh douk hurukatin um hugok. Douk namudok aria ipak ta pikitak aria punekeh dodogowih abom atih. Um maresh? Eikin debeini Iruhin natik ipak penekeh iri aih jurug aria nakri eheh douk madae yopih uwe, uwok. ³ Douk namudok aria ipak wata urkwip purum enyudok baraen douk seiwok ipak pemneken iri aria wata pugipeshen. Aria putanam pukeshuk agabus yoweishi inahos aria wata punakumori eik. Uwok um, eik ta inaku kabi anan nakwuaruh iri nanakumagu aria ipak

* **3:1:** Putik futnot nyape Revelesen 1:4 iri.

ta mare pudukemesh um abudok nyutob eik inaku itogrume obi nyutob.

⁴ Aria ipak karowip pape Sardis iri madae pugipesh yoweih iah uwe. Aria enyudok enyen douk kabi ipak madae punek ipakih rupeh hubbosuh um uwe. Aria ipak atip ta pur ehudok shigorihihi rupeh aria puni eik munak atugun. Um maresh? Ipak douk yopishi arpesh aria ipak douk wosik um puni eik munak atugun um. ⁵ Aria eshudok arpesh douk shiyotu dodogowish atish shunek wanohw shubo yoweishi inahos shubuhuk iri, eik ta ikesh eshudokmori shigorihihi rupeh shihur. Eshesh ta shihur kabi ipak karowip pape Sardis iri perhur um. Aria eik ta mare itorihuk esheshish nyeiguhw douk shatem okwudok buk douk eshudok arpesh ta shupe wosik iih nyumneh iri esheshish nyeiguhw shatemokwi, uwok. Aria eik ta ikrip eikin Yain nini ananish enselahos yopugunum um eshudok arpesh ikri eshesh douk eikish arpesh. ⁶ Aria douk ipak arpesh arigos sapenyep iri ta pumnek enyudok baraan Iruhin ananin Mishin nyakrip ananish arpesh-nyi aria pusuwen dodog pugipeshen.’ ”

*Baraen Nyanak Um Iruhin Ananish Arpesh
Shape Filadelfia Iri*

⁷ Aria Jisas nakripe nakri, “Jon, nyak wem enyudok baraan anap shup nyunak um enyudok ensel douk nyape nyeyoh Iruhin ananish arpesh shape Filadelfia iri. Aria eik Jisas eikin baraan douk enyudok. ‘Eik douk yopuweiri abom douk

aria eikin baraen douk adurin atin yasuhw ki† um atudok wit douk seiwok King Devit nasuwen iri. Aria ta eik ijik wit um, ta mare enen arpen dodogowin um nyutaru. Aria shopunek, ta eik itaru um, ta mare enen arpen dodogowin um nyijikat. ⁸ Eik douk yadukemesh um ihihmorim aih ipak pape penekeh iri. Aria shopunek, eik yadukemesh um ipak douk madae dodogowip um punek eikin mour wosik um uwe. Aria ipak pagipesh ihinyumorim eikin baraen aria madae pubeshuk eikin nyeigur uwe, uwok. Aria ipak tik. Eik yejik anat wit tanejik tapeimep. Aria ta mare enen arpen dodogowin um nyutaru, uwok. ⁹ Aria ipak pumnek! Ipak douk padukemesh eshudok Satan ananish arpesh. Eshesh shenek rohw shakri eshesh douk Juda, aria eshesh douk madae Juda abom uwe. Eshesh douk shenek rohw iri. Douk namudok aria eik ta inekesh shunaki shubuh shuduk ohrubus hurukatin um ipakiruh yeriweruh. Aria abudok nyutob eshesh ta shudukemesh shukri adur atin eik douk urkum manawashamep ipak Iruhin ananish arpesh pape Filadelfia iri. ¹⁰ Ipak douk pagipesh eikin baraen wosik peyotu dodogowip aria madae juwehosip arigas uwe um enenyenen amaen douk nyatogrumeperi. Namudok aria abudok nyutob eneheneh kwiraeh hutogur um hukwiraeh ihishmorim arpesh shape agundok atap iri um, eik ta itaurumep piyotu dodogowip

† **3:7:** Enyudok baraen nyakri Jisas Krais atun narao big um nukri meishi arpesh shuwish numun Iruhin ananibur namuburi wabur Jerusalem douk ta bukutukuk iruhw heven bubuhi iri (Revelesen 21:2).

atip aria pupe wosik.

¹¹ Aria eik douk hurukatin um inaku. Douk namudok aria ehudok yopuhi aih ipak pagipesheh penekeh iri ipak ta gamo pusuweh dodog. Ta wosik atin enesh kupaishi arpesh shutrip shuraoukuk enyudok ipakin yopinyi prais douk ta ipak puraen iri. ¹² Aria eshudok arpesh douk shiyotu dodogowish atish shunek wanohw shubo yoweishi inahos shubuhuk iri, eik ta inekesh shiyotu dodogowish atish kabi anohw urohw douk hwatao hwoSAH eikin debeini Iruhin ananit debeitI urupat iri. Aria eshesh ta mare wata shuktukuk shutogur shunak, uwok. Eik ta iwem eikin Iruhin ananin nyeigur nyuni ananibur namuburi wabur Jerusalem ababurin nyeigur nyutem eshudok arpesh esheshiruh yegeshiweruh. Abrudok wabur ta bukutukuk iruhw heven douk eikin Iruhin napecum bubuhi iri. Aria eik shopunek ta iwem eikin naminyi nyeigur nyutem esheshiruh yegeshiweruh. ¹³ Aria douk ipak arigos sapenyepi um ta pumnek enyudok baraen Iruhin ananin Mishin nyakrip ananish arpesh-nyi aria pusuwen dodog pugipeshen.”

Baraen Nyanak Um Iruhin Ananish Arpesh Shape Laodisia Iri

¹⁴ Aria Jisas nakripe nakri, “Jon, nyak wem enyudok baraen anap shup nyunak um enyudok ensel douk nyape nyeyoh Iruhin ananish arpesh shape Laodisia iri. Eik Jisas eikin baraen douk adurin. Enyen douk enyudok. ‘Eik douk yeyotu dodogoiwe atuwe abom yakripesh yopinyi abom wosik Iruhin ananin adurin atinyi baraen

iri. Aria eik douk baugos um ihishmorim es-hudok eneshenesh douk Iruhin nenekesh shape iruhw atap iri shani ihishmorim arpesh. Eik yenekumepogu enyudok baraen ipak. ¹⁵ Eik yadukemesh um ehudok aih ipak pape penekes iri um pape penek eikin mour um. Ipak douk madae nyumanugasip abom uwe aria shopunek, madae juwehosip abom uwe. Aria eik yakri ipak ta nyumanugasip abom o juwehosip abom. ¹⁶ Aria uwok. Ipak madae juwehosip abom uwe o madae nyumanugasip abom uwe. Ipak juwehosip karowih atin. Douk namudok aria eik ta igugurukwep putograri eikit nokwat! ¹⁷ Aria ipak pakri, “Apak manabuk sabaibori utabor bani sabaishi eshudok eneshenesh. Apak madae yaruhih um enesh eshudok eneshenesh uwe.” Aria ipak pape yowep abom. Aria arpesh ta shutrip aria shenek gihaumep. Eik yatrip um, ipak douk kabi yaruhih um eneshenesh yopishi eshudok iri um. Ipak kabi douk nabes se-shukeshi arpesh um. Ipak kabi douk rupeh wocep aria pagor pape um. Aria ipak douk madae pudukemesh uwe. ¹⁸ Douk namudok aria eik yakri ikritep enyudok baraen. Eikir gol douk debeihi nyih hanur aria henekar ratogur yopur abom. Douk namudok aria ipak putor arudok gol um, ipak ta putogur debeipari kabi shogrem sabaibori utabor iri um. Aria punator shigorihiwihi rupeh aria pihur um punoshigar ipakiruh yegehiweruh um arpesh mare shutrip pugor pupe aria abraen nyupeyep, uwok. Aria shopunek, ipak putor marasin aria punayok nabes um ipak wata putrugun wosik. ¹⁹ Eshudok

arpesh douk eik urkum manawashamesh iri, eik ta ihesh um inekesh shutogur yopishi arpesh abom. Douk namudok aria ipak urkwip ta purum ipakih aih aria pukeshuk agabus yoweishi inahos aria pukon aparuh Iruhin abom. ²⁰ Ipak pumnek! Eik yeyotu wit aria yape yarigep. Aria meinyi arpen douk nyumneke aria nyijkume wit iri, eik ta iwish ini enyen upe numun. Aria ohwak ta upe uwok worigun atugun.

²¹ Aria eshudok douk shiyotu dodogowish atish shunek wanohw shubo yoweishi inahos shabuhuk iri, eik ta ikesh debeinyi nyeigur um shupe debeishi aria shuni eik mupe eikin debeinyi wagitur. Kabi douk seiwok eik yeyotu dodogoiwe yenek wanohw yabo yoweishi inahos shabuhuk aria douk yape debeiweiri yani eikin Yain wape ananin debeinyi wagitur um. ²² Aria douk ipak arigos sapenyep iri um ta pumnek enyudok baraaen Iruhin ananin Mishin nyakrip ananish arpesh-nyi aria pusuwen dodog pugipeshen!”

4

Shenek Lotu Um Iruhin Gani Iruhw Heven

¹ Douk enyudok nyanakuk aria eik yatik anat wit tanajik tape iruhw heven. Aria yemnek anah mah. Aria enyudok arpen nyeyagwreh debeg kabi shahapur oruhw-umori douk iganigadae yemneken nyeyagwrehi iri nyakripe nyakri, “Nyak nyutowi agundok iruhw aria iyabigen eshudok eneshenesh douk ta shutogur iri.”

² Aria ahudok atuh Iruhin ananin Mishin nyatogrume dodogowin atin aria yatigu enen debeinyi wagitur douk king-omi atum hapenyen iri nyakus iruhw heven. Aria anan arman nape enyudok wagitur. ³ Anan natrugun kabi anam yopumi abom utom nyeigurim um jaspa iri um mani kupaimi owishiborimi nyeigurim um konilian iri batrugun um. Aria enen renbo nyakus aria enyenyir yamuger rakih rananug enyudok debeinyi wagitur. Enyudok renbo douk yopin abom kabi anam yopumi grinporeim utom nyeigurim um emeral iri um. ⁴ Aria 24-poreish debeishi wagiturahos shopunek shakus shersharih um enyudok debeinyi wagitur. Aria anam debeimi armam 24-poreim hatem eshudok wagiturahos. Amam hore shigorihwihi rupeh aria howem yopugwi hatog shenekog gol iri douk king-omi atum hogwem iri. ⁵ Aria utag bogaragi gani enyudok debeinyi wagitur nyakus um aria utag brereyarog geyagwreh debeg. Aria hurukatin um enyudok debeinyi wagitur 7-poreish oure-hish douk hanish atish iri shakus. Eshudok ourelish douk shakri wobuwobren baraen um Iruhin ananish 7-poreish yopishi mishish.* ⁶ Aria hurukatin um enyudok debeinyi wagitur, enen enyudok kabi douk debeigwi youg um nyakus. Enyen nyatrugun abom nyape kabi wenyir um. Aria eshudok 4-poreish dodogowishi eshudok douk mishish shoresh iri shape orokohun aria shape shersharih um enyudok debeinyi wagitur. Aria sabaisi nabes sape yamagosish um shani aparuhish um shani agabusish um. ⁷ Aria nyarik

* **4:5:** Putik futnot nyape Revelesen 1:4 iri.

iri dodogowinyi douk mishin nyoren iri douk nyape kabi enen debeinyi wanohwinyi mahin nyeigurinum laion iri. Aria nyagiguk iri nyape kabi enen abonin bulmakau um. Aria binyatin iri enyenyig yamag gape kabi arpenyig yamag um. Aria nubatin-enyi nyape kabi anan debeini kumun nehuru nanak iruhw iri um. ⁸ Aria eshudok nubatish, eshesh atin atin douk anawipish kapraigiyohos shapenyesh. Aria numuniruh um hani adukiruh um esheshiruh yegeshiweruh ihiruhmorim douk shukniruh abom um nabes atus. Aria nyumneh weibus eshesh shapeum shakri,

“Debeini Iruhin douk dodogowini abom.

Anan douk yopuni abom, anan douk yopuni abom,

anan douk yopuni abom.

Seiwok nape, aria douk shopunek nape,
aria kweipon shopunek ta nunaki.”

Eshesh madae shupe um shurao uhwin atin um shakri enyudok baraen um uwe. ⁹⁻¹¹ Eshesh shape shatuk Iruhin douk nape enyudok debeinyi wagitur iri ananin nyeigur nyato iruhw. Anan douk nape iih nyumneh iri. Eshesh shanadudareh-uman shenek tenkyuman shakri anan yopuni. Aria abudok nyutob eshudok nubatish dodogowishi douk mishish shoreshi shenekesh namudok um, amudok 24-poreim debeimi habuh hoduk ohrubus hurukatin um Iruhin douk nape wosik abom iih nyumneh iri douk nape enyudok debeinyi wagitur iri aria hape henek lotuman. Amam honik amamig yopugwi hatog douk king-omi atum hogwem iri

hawashog hurukatin um enyudok debeinyi wagit
itur aria hakri,
“Apakin debeini Iruhin, nyak douk
dodogowinyi yopunyi abom.
Aria ihishmorim arpesh ta shutuk nyakin atin
nyeigur nyuto iruhw.
Um maresh? Nyak nyagipesh nyakim atum
urkum
aria nyenek ihishmorim eneshenesh eshudok
shatogur shape aria nyorukesh yapis.
Eshesh douk nyakim urkum atum morumesh
nyakriyesh
aria eshesh shatogur shape.”

5

Jon Natik Onok Buk Douk Shaweshigok Iri

¹ Aria eik Jon yatik anudok arman douk natem enyudok debeinyi wagitur iri nasuhw onok buk ananin yopunyi rogur. Okwudok buk okwok douk kabi anap roupi shup um. Okwok douk shadareshok aria showeshigok. Aria baraen shenyem nyape numunik um kwani aduk shopunek. Aria showeshigok 7-poreih shakwu kendelis gris. ² Aria eik yatik enen dodogowinyi ensel nyape nyeyagwreh debeg nyakri, “Meinyi arpen douk yopin abom aria wosik um nyubahiguk asudok kendelis gris douk showeshik okwudok buk um aria nyukweshihok?” ³ Aria madae shutik enen atin arpen nyape iruhw heven iri o agundok atap iri o shakamum agundok atap iri douk ta wosik um nyukweshihok aria nyutik numunik um iri. ⁴ Aria douk yatik um madae shuparug enen arpen

uve douk wosik um nyukweshih okwudok buk aria nyutik numunik um iri. Douk namudok aria eik yereh debeg. ⁵ Aria anan um amudok 24-poreim debeimi nanaki nakripe nakri, “Kwamnek! Nyak mare nyureh! Anan arman um apudok awirop nyeigurip um Juda iri douk nikitak Devit ananip awirop iri douk dodogowin kabi enen wanohwinyi mahin nyeigurinyum laion iri. Anan douk neyotu dodogowin atun nenek wanohw nabo yoweishi inahos shani ihishmorim ananish horim shabuhuk. Douk namudok aria anan douk dodogowin aria wosik um nubahiguk asudok 7-poreis kendelis gris douk showeshik okwudok buk um aria nukweshihok.”

Jon Natik Enen Nugaen Sipsip

⁶ Aria yatigu enen Nugaen Sipsip nyeyotu hrukatin um enyudok debeinyi wagitur. Aria eshudok nubatish dodogowishi douk mishish shoresh iri shani amudok 24-poreim debeimi sheyotu shersharih enyudok Nugaen Sipsip. Enyen nyubrug gwapenyen kabi shaen nyagok iri um. Enyen 7-poreiruh shuwaruh hakih enyeniyig barag aria 7-poreis nabes sapenyen. Asudok nabes douk sakri wobuwobren baraan um Iruhin ananish 7-poreish mishish* douk anan neshopokesh shanak ihigunmorim um agundok atap iri. ⁷ Aria enyudok Nugaen Sipsip nyanaki nyatrunk okwudok buk anudok douk nasuok yopunyi rogur aria nape debeinyi wagitur iri. ⁸ Douk enyen nyatrunk aria eshudok nubatish dodogowishi douk mishish shoresh iri

* **5:6:** Putik futnot nyape Revelesen 1:4 iri.

shani amudok 24-poreim debeimi shabuh shaduk
 ohrubus shakus hurukatin um Nugaen Sipsip
 aria shenek lotumen. Aria ihm-morim amudok
 debeimi hasuhw sisigish atish enesh eshudok
 kabi gitahas um shani anas dis douk shenekas
 gol iri. Asudok dis douk shuknis um enyudok
 paura douk enyeniyigus nyugus seisik wosik
 iri. Enyudok paura douk nyakri wobuwobren
 baraen um beten douk Iruhin ananish arpesh
 shape shenekan iri. ⁹ Aria eshesh shape sheyarub
 onohw namuhwi awehw shakri,
 “Nyak douk yopuni abom aria wosik um nyutrun
 okwudok buk
 aria nyukweshih ihismorim kendelis gris douk
 showeshigok um.

Um maresh? Eshesh shaen nyagok
 aria nyakibor owishibor batourak bator
 ihismorim awirosish arpesh
 aria bakweshihesh shape Iruhin ananish atish.
 Eshesh douk shape ihismorim sisigis debeisi
 awiros
 aria sheneyagwreh sabainyi kupainyi baraen iri.
 Eshesh douk sabairuhi sisigiruh yegeshiweruh-
 ish arpesh douk shape ihirubmorim de-
 beirubi warub nahobigos
 abudok amnab agundok atap iri.

¹⁰ Nyak douk nyenekam hatogur pris douk hape
 henek ofa um
 eneshenesh eshudok hako apakin Debeini Iruhin
 iri.
 Aria anan ta nupe Debeini nusuhw merikw-
 umesh
 aria kweipon eshesh ta shupe debeishi
 kabi douk debeimi king-omi

aria shusuhw merik um ihishmorim arpesh
shape agundok atap iri.”

*Eshesh Shatuk Nugaen Sipsip Enyenyin Nyeigur
Nyato Iruhw*

¹¹ Aria wata shopunek yatrugunugu aria yemneku eshudok sabaishi Iruhin ananish enselahos esheshih meh. Shadarehesh um douk shatogur sabaishi abom. Sabaibi tausenab bani sabaibi milionab. Eshudok sabaishi enselahos sheyotu shersharih enyudok debeinyi wagitur nyani eshudok nubatish dodogowishi douk mishish shoresh iri shani amudok 24-poreim debeimi armam. ¹² Aria eshudok enselahos sheyarub debeg shakri,

“Enyudok Nugaen Sipsip douk seiwok shaen nyagok iri douk yopunyi abom.

Douk namudok aria enyen douk wosik um nyirao debeinyi nyeigur

nyuni utabor buni eneshenesh yopishi eshudok shuni debeinyi dodog.

Aria shopunek enyen douk wosik um nyurao yopinyi saki

aria wosik um apak mutuk enyenyin atin nyeigur nyuto iruhw.

Aria enyen douk wosik um apak munadudarehumen abom aria mutuk enyenyin atin nyeigur nyuto iruhw

aria munek lotumen.”

¹³ Aria eik yemnek ihishmorim eshudok douk Iruhin nenekeh shape iruhw atap iri shani eshudok douk shape shakam agundok atap iri shani ihishmorim shape shakam debeigwi youg iri shape sheyarub onohw awehw shakri,

“Apak makri ihishmorim eneshenesh eshudok
shunadudareh um
anudok nape debeinyi wagitur iri nini Nugaen
Sipsip.

Aria shutuk esheshish nyeiguhw shuto iruhw
aria shunek lotumesh ihih nyumneh.

Aria makri ihinyumorim debeinyi dodog nyuni
agundok natrugun aria nape dodogowini
um shupe um

eshesh biyesh ihih nyumneh!”

¹⁴ Aria eshudok nubatish dodogowishi douk
mishish shoresh iri shakri, “Adur atin!” Aria
amudok 24-poreim debeimi armam habuh hoduk
ohrubbus atap aria henek lotu um Iruhin nani
Nugaen Sipsip.

6

Nugaen Sipsip Nyabrig Kendelis Gris Soweshik Buk Iri

¹ Aria yatigu Nugaen Sipsip nyohur okwudok buk douk shadareshok showeshigok 7-poreis kendelis gris iri nyasuok aria nyabahiguk sarig iri kendelis gris. Aria eik yemnek enen sago-matin um eshudok nubatish dodogowishi douk mishish shoresh iri nyeyagwreh. Aria enyenyih mah heyagwreh um kabi douk utag pogarog um. Aria enyen nyakri, “Nyak yowi.” ² Aria yatigu enen shigorihwinyi hos nyanaki. Aria anudok arman natem enyudok hos iri nasuhw enen kein. Aria shopunek, shakon anat yoputi hat douk eshudok arpesh douk shenek uhwinyum wanohw iri shogur iri. Aria abudok nyutob anan natem hos nanak kabi anan nenek uhwinyum

wanogwiruh aria nakri nunek onohw shopunek wanohw nunek uhwinyumoh iri. ³ Aria Nugaen Sipsip nyabahiguk sagiguk iri kendelis gris aria eik yemnek enyudok nyagiguk iri dodogowinyi douk mishin nyoren iri nyakri, “Nyak yowi!” ⁴ Aria yatigu enen owishiborinyi nyatrugun iri hos nyanaki. Aria anudok arman natem enyudok hos iri narao dodog um nuhur shape agundok atap iri arpesh esheshiruh aparuh um shurpak aria shubo kupaishi shugok. Aria shakon anat debeiti bainat.

⁵ Aria Nugaen Sipsip nyabahiguk binyatinyis kendelis gris aria eik yemnek binyatin-in enyudok dodogowinyi douk mishin nyoren iri nyakri, “Nyak yowi!” Aria eik yatrugunugu aria yatigu enen behrabinyi hos nyanaki. Aria anudok arman natem enyudok hos iri nasuhw enen skel douk shape shenek skelum eshudok eneshenesh um ananis wis. ⁶ Aria yemnek enen enyudok kabi douk enen arpen enyenyih mah um. Enyen nyeyagwrehi agundok eshudok nubatish dodogowishi douk mishish shoresh iri shape-mori. Aria enyudok nyeyagwrehi iri nyakri, “Nyak nyunak nyunek nyakin mour aria arpesh ta shugok um nyurub. Wit iri bali ta karowish atish aria ta shutoumesh um debeibori utabor. Douk namudok aria shunek mour atuh nyumnah shurabor iri utabor ta wosik um shutor atup shokupi marup um wit, o bias atup shokusi marus um bali kabi douk rais um. Aria agusudok rowos douk shape shenek wel-agos iri sani agusudok douk shadi wainip shuruwep-agosi nyak mare nyununugos!”

⁷ Aria Nugaen Sipsip nyubahiguk nubatis kendelis gris soweshik okwudok buk iri. Aria eik yemnek nyagiguk iri nubatin dodogowinyi enyudok mishin nyoren iri nyakri, “Nyak yowi!”

⁸ Aria eik yatigu enen akitohinyi hos nyanaki. Aria anudok natemori enyudok hos iri ananin nyeigur douk nanahwar Gok. Aria anudok anan douk debeini nasuhw merik um abrudok wabur douk shagok iri shapenyaburi nagimani. Aria arpesh shape agundok atap iri shenesiyao um nubatis awiros. Aria amam harao dodog um hubo anap awiropish eshudok arpesh shugok. Enesh hakwumesh bainatog haesh shagok, aria enesh shagok um nyurub. Aria enesh yoweishi arugeh haesh aria shagok, aria enesh wanohwishi wanarish mahish shaesh shagok. ⁹ Aria Nugaen Sipsip nyubahiguk anas wisish kendelis gris soweshik okwudok Buk iri. Aria eik yatigu eshudok arpesh douk seiwok abom shasuhw Iruhin ananin baraen dodog shakripesh um agundok Jisas nataurumesh um aria kupaishi arpesh shaesh shagok iri esheshish mishish. Eshesh shape shakam enyudok alta douk shape showem eshudok um shenek ofamesh shako Iruhin iri um. ¹⁰ Aria eshesh shahwar debeg shakri, “Dodogowini Debeini, nyak douk adurinyi yopuniyi abom nyasuhw iruhw atap iri! Ta mak-wunih nyumneh hunak hudiguk aria nyak kadak nyunekumesh kwotog agundok atapishi arpesh um nyuwanamesh yoweishi inahos um agundok shabo apak magok um?”

¹¹ Aria Iruhin nekesh rouhi shigorihwihi rupeh um atin atin eshudok arpeshish mishish aria

nakripesh namudok nakri, “Ipak pupe pishukabar banab nyutob shopunek um arigaha shubo ipakish ashukenyish owashish douk shani ipak panuboum penek atin mour iri shugok kabi douk shabo ipak pagok um ba iyoh. Douk eshesh shesh shugok arigaha shunak shutogurum enyudok namba eik yakriyen iri aria eik ta kadak iwanom-umep ereb.”

¹² Aria yatigu Nugaen Sipsip nyabahiguk anaw-ipis kendelis gris douk soweshik okwudok buk iri aria debeikwi enyik kwatuk agundok atap. Aria nyumnahin aun natogur behrabin kabi anah yoweih i behrabih rupah um. Aria wabin aun natogur owishiborin kabi owishibor um.

¹³ Aria unib wape iruhw utag iri wanatuk wa-gruki atap kabi enep watakipi fikip shuruwep douk dodogowinyi uhwin nyasusuep tutukarep pagruk-umori um. ¹⁴ Aria iruhw utag ganak gawishuk kabi shadaresh anap jarukwip um. Aria ihiruhmorim yodururu hani unaihos shanak abom shapeik kupaigunum.

¹⁵ Aria amudok hape king um agundok atap iri hani anam debeimi nyeiguhw shatoumami, hani amudok debeimi hasuhw merik um ami iri, hani eshudok douk shanagrem sabaibori utabor bani jah iri, shani eshudok dodogowishi arpesh, shani ihishmorim arpesh douk shape shakamum kupaishi shenekumesh mour meyoh iri, shani eshudok douk shape wosik iri, eshesh ihishmorim shanak shawish shanabeshuk shape hurupiruh hani debeiwori burbudugiyu douk watao yodururu iri. ¹⁶ Aria eshesh shahwar yodururu hani debeibori utabor shakri, “Ipak

pubuh pishapomapuk um anudok nape debeinyi wagitur iri um mare nutrup. Aria shopunek um pubeshukapaguk um Nugaen Sipsip juwehosin um mare nyunekumap kwotog aria nyunekap murao debeiri eriger. ¹⁷ Um maresh? Ahudok debeihi nyumnah um anudok nape debeinyi wagitur iri nini Nugaen Sipsip amam juwehosim um huwanamesh eneshenesh yoweishi inahos es-hesh shape shenekesh iri um douk hatogur. Douk namudok aria omi ta dodogowin um nyunek uhwinyumam? Adur atin ta uwok.”

7

Sabaishi Israel 144,000-Poreish Sharao Iruhin Ananin Kak

¹ Douk enyudok nyanakuk aria eik yatru-gunugu aria yatigu nubatish enselahos sheyotu anagas um nubatin kona um agundok atap um agudok nahobig. Aria eshesh shasuhuk uh-win douk nyahur nubatin kona iri um mare nyahur agundok atap o nyahur youg o nyahur nyususuhw enen rowog. ² Aria wata yatigu kupainyi ensel nyatowi nyanaki iruhw gani aun nakihumori. Enyen nyasuhwi enen enyudok douk Iruhin nape abom ihih nyumneh iri ananin kak nyapeyenyi. Aria nyahwaresh debeg es-hudok nubatish enselahos douk Iruhin nekesh dodog um shununu agundok atap nini youg iri. ³ Enyen nyakri, “Ipak mare arigas pununu agundok atap nini youg iri rowos, watak. Apak makri muwem-umesh Iruhin ananin kak nyupe yomogos um eshudok arpesh douk shenek apakin

Iruhin ananin mour iri ba iyoh aria ipak kada
pununu eshudok eneshenesh."

⁴ Aria eik yemnek um shadareh eshudok arpesh douk sharao Iruhin ananin kak iri. Eshesh shadarehesh shanak shatogur sabaishi um 144,000-poreish. Eshudok sabaishi arpesh douk shanaki asudok ihismorim 12-poreis debeisi awiros um eshesh Israel. ⁵ Apudok awirop shahwarop um Juda iri, sharao kak aria shatogur 12,000-poreish. Aria apudok anap awirop shahwarop um Ruben iri 12,000, aria apudok shahwarop um Gat iri 12,000. ⁶ Aria apudok shahwarop um Aser iri 12,000, aria apudok shahwarop um Naptali iri 12,000. Aria apudok shahwarop um Manase iri 12,000. ⁷ Aria apudok shahwarop um Simeon iri 12,000, aria apudok shahwarop um Livai iri 12,000. Aria apudok shahwarop um Isakar iri 12,000. ⁸ Aria apudok shahwarop um Sebulun iri 12,000, aria apudok shahwarop um Josep iri 12,000. Aria apudok shahwarop um Benjamin iri 12,000. Asudok awirosish arpesh sharao Iruhin ananin kak.

Sabaishi Arpesh Shenek Lotu Um Iruhin

⁹ Douk enyudok nyanakuk aria eik yatrugunugu aria yatigu sabaishi sisigiruh yegeshiweruh-ish arpesh. Eshudok arpesh douk madae wosik um shudarehesh uwe, uwok. Eshesh douk ihismorim debeisi awirosish arpesh douk sheneyagwreh sabainyi kupainyi baraen iri. Eshesh douk shanaki ihigos-morim nahobigos douk sape agundok atap iri shantorum shape. Eshesh shore shigorihiwi rupeh aria

shasuhw palmenis shus esheshis wis aria sheyotu hurukatin um enyudok debeinyi wagitur nyani Nugaen Sipsip. ¹⁰ Aria eshesh shahwar debeg shakri, “Apakin Iruhin douk nape debeinyi wagitur iri nani Nugaen Sipsip amam atum abom hanarap matanamori mape wosik.”

¹¹ Aria ihishmorim enselahos sheyotu sher-sharih enyudok debeinyi wagitur nyani amudok 24-poreim debeimi hani eshudok nubatish dodogowishi douk mishish shoresh iri shabuh shaduk ohrubus hurukatinyum enyudok debeinyi wagitur aria shape shenek lotu um Iruhin.

¹² Shakri,

“Adur atin! Apak manadudareh um apakin Iruhin
aria matuk ananin nyeigur nyato iruhw
aria makri anan yopuyopuni.
Aria apak ta munek tenkyuman ihih nyumneh.
Aria debeinyi nyeigur nyuni yopipi urkwip
puni saki iri dodog ta shupe abom um anan atun
ihih nyumneh. Adur atin!”

Arudok Eriger Douk Eshudok Arpesh Shemnegor Iri Douk Ratuh

¹³ Aria anan um amudok 24-poreim debeimi narige nakri, “Eshudok arpesh shor rouhi shigorihiwi rupeh iri douk meishi? Eshesh shanaki meigunum iri?”

¹⁴ Aria eik yakripaŋ yakri, “Debeini, nyak kanak douk nyadukemesh, eik uwok.” Aria anan nakripe nakri, “Eshudok arpesh seiwok shape agundok atap aria eshudok douk shakanuk

agabus Iruhin iri shenekesh shemnek debeiri eriger. Aria eshesh shakwrup esheshih rupuh Nugaen Sipsip enyeniyibor owishibor aria hatogur shigorihwih. ¹⁵ Douk namudok aria eshesh douk sheyotu hurukatin um Iruhin ananin yopunyi wagitur. Aria nyumneh weibus eshesh shape shenek ananin mour numun ananit debeiti urupat. Aria anudok douk nape enyudok wagitur iri ta nini eshesh nupe aria nutaurumesh. ¹⁶ Aria nyurub ta mare wata besh atin aria abar shopunek ta mare besh atin, uwok. Aria debeihi wah shopunek ta mare wata hutao hesh shumnek debeiri eriger, uwok. ¹⁷ Um maresh? Nugaen Sipsip douk nyeyotu orokohun hurukatin um debeinyi wagitur iri ta nyupe nyutaurumesh wosik kabi anudok nataurum sipsip wosik iri um. Aria enyen ta nyuraesh shunak shuwok abrudok abar douk ta shubaroh aria bunekesh shupe wosik abom ihih nyumneh iri. Ababar douk bakih atap meyoh bor iri. Aria Iruhin ta nubatikumesh ihishmorim abih aria eshesh ta mare wata shureh atin, uwok.”

8

Nugaen Sipsip Nyabahigeshuk Namba 7 Kendelis Gris Soweshik Buk Iri

¹ Douk Nugaen Sipsip nyabahigeshuk namba 7 kendelis gris douk soweshik okwudok buk shadareshok iri gani iruhw heven. Aria madae enesh eshudok shiyagwreh o shubirak uwe, uwok. Ihishmorim eshudok shape mukareg banab nyutob hurukatin um tukwanin aua. ² Aria

yatigu eshudok 7-poreish enselahos douk shey-
otuwi hurukatin um Iruhin iri sharao 7-poreiruh
aruruh.

³ Aria kupainyi ensel nyasuhw anas dis
douk shenekas gol iri um shure paura douk
shashainyeh nyenek nyugus seisik wosik iri um.
Enyen nyasuhw asudok dis aria nyanaki nyeyotu
hurukatin um alta douk showem eshudok shenek
ofamesh shako Iruhin iri um. Aria sheken
sabainyi paura um nyinyanuh um ihishmorim
Iruhin ananish arpesh esheshin beten douk
shape sheneken iri. Aria nyeshem enyudok alta
douk sheneken iri nyatao hurukatin um debeinyi
wagitur iri aria nyenek ofamesh um Iruhin.

⁴ Aria nyih hanu enyudok paura douk enyudok
ensel nyasuwen enyenyis wis iri aria nyugus
sani Iruhin ananish arpesh esheshin beten
shakitak shato um agundok Iruhin napeum.

⁵ Aria enyudok ensel nyasuhw asudok dis
enyudok paura nyor um aria nyanak hurukatin
um enyudok alta aria nyonik nyih nyehur dis
shukunis aria nyawasheh hagruki agundok
atap. Douk enyen nyawasheh hagruki aria
utag brereyarog gatrugun abom aria geyagwreh
debeg aria debeikwi enyik kwatuk.

Nubatish Enselahos Shahapurish Aruruh

⁶ Aria eshudok 7-poreish enselahos shasuhw
7-poreiruh aruruh iri shenek redi um shaha-
pururuh. ⁷ Aria nyarik iri ensel nyahapurish
enyenyihw oruhw aria shigorihwisi ais douk
dodogowis kabi utabor-umori sani nyih douk
shenenek um owishibor iri shagruki agundok
atap. Aria shasiya agundok atap nani rowos

um biwotuk outumeb. Aria ehudok nyih hanu onok outuk aria hanu ihigos-morim rowos iri wishap heyateshuk. Aria bio outumeb wapeik, nyih madae hunu uwe.

⁸ Aria nyagiguk iri ensel nyahapurish enyenyihw oruhw aria shawashak enen enyudok kabi douk onohw debeihwi nyih hanuhw iri yoduhw hwagrukuk youg. Aria shasiyauk youg um biwotuk outumeb aria onok outuk youg gwanenem um owishibor. ⁹ Aria shasiya ihishmorim eshudok eneshenesh shape youg iri um bibatun lainab aria anan lain shagok shatuh. Aria shopunek, shasiya ihiyumorim kroruhiyor douk wor youg iri um bibatun lainab aria anan lain yoweu abom gririgarо watuh.

¹⁰ Aria binyatin iri ensel nyahapurish enyenyihw oruhw aria onok takweikwi unuk douk hanuk nyih jorarehok kabi hanu arkirub um aria kwakutukuk iruhw aria kwanatuk kwagruki agundok atap. Aria shadareh ihibusmorim worubus um bibatun lainab aria okwudok unuk kwagrukuk kwabo anan lain um worubus sani ihibarmorim abar douk bakih atap meyoh iri. ¹¹ Aria anan lain senenem um nubutibari abar. Aria sabaishi arpesh shawok abrudok abar aria baesh shagok shatuh. Nyeigurik um okwudok unuk douk Nubutini Marasin.

¹² Aria nubatin iri ensel nyahapurish enyenyihw oruhw aria shasiya nyumnahin nani wabin aub bani ihiyumorim unib um biwotuk outumeb. Aria eshesh shanunu onok outuk um anudok nyumnahin aun nani onok outuk um wabin aun aria onok outuk um oudok unib aria shatogur arukwutigunish. Aria shatupak nyumnah um

bibatin nyutob aria wab um bibatin. Douk namudok aria nyumnah biyab nyutob batrugun um aria anob nyutob arukwutigun. Aria wab shopunek namudok atin, biyab nyutob wanyukeh aria anob nyutob arukwutigun.

¹³ Aria yatrugunugu aria yatigu anar debeiri armir kabi douk kumun um rehuru ranak iruhw. Aria yemnek um arar reyagwreh debeg rakri, “Gihaumesh arpesh shape agundok atap iri. Um maresh? Hurukatin um eshudok bishatin enselahos ta shihapurish esheshiruh aruruh aria enenyenen amaen ta nyutogur um eshudok atapishi arpesh aria ta nyunekesh shunamnek debeiri eriger.”

9

Anas Wisin Ensel Nyahapurish Enyeniyhw Oruhw

¹ Douk anas wisin ensel nyahapurish enyeniyhw oruhw aria yatik onok unuk kwanatuki kwakutukuk iruhw kwagruki jurug agundok atap. Okwudok unuk douk shakok enyudok ki um agudok nuwag douk gagor gabuhuk gani atap aria atapig um madae gubuh giyotu anabik iri uwe. ² Aria abudok nyutob enyen nyejik agudok nuwag obi nyutob, sabaigwusi nyugwus sakih sato abom kabi douk debeishi nyih hanu um. Aria agwusudok nyugwus sato aria sakih seyawiyamuk nyumnahin aun aria aun nani iruhw shopunek arukwutigun abom. ³ Aria sabaishi eshudok kabi douk debeishi gormish um iri shakutukuk ogwusudok nyugwus shagruki agundok atap. Eshesh douk sharao dodog aria wanohwish kabi

douk pupiyak um. ⁴ Aria Iruhin nakripesh um es-hesh mare shubo wishap puni eneshenesh douk shatogur agundok atap aria shuni rowos shugok, uwok. Eshesh ta shubo eshudok arpesh douk madae shurao Iruhin ananin kak nyupe eshesis domaesh iri uwe atish shunekesh shumnek debeiri eriger.

⁵ Aria eshudok kabi douk gormish um iri shape shanatuk eshudok arpesh um anas wisib aub. Aria eshesh shape shemnek debeiri eriger kabi douk pupiyagwihiyar wanatukesh shemnek um. Aria eshesh madae shurao dодог um shubo eshudok arpesh shugok uwe, uwok. ⁶ Aria abudok nyutob eshesh ta shurim yeh um shugok um. Aria shopunek, eshesh ta shukri abom um shugok um atin aria ta uwok. Gok ta nyuruwok-umeshuk.

⁷ Aria yatik eshudok gormish shape kabi douk hwosahos um shape shenek redi um shunak um wanohw. Esheshigos baragos douk enesh eshudok kabi douk yopugwi hatog shenekog gol iri gwatem um aria esheshigos yamagos sape kabi arpeshigos um. ⁸ Aria esheshigos baragos sape kabi armago-wigos um. Aria esheshiruh naruh hape kabi enen debeinyi wanohwinyi mahin nyeigurin um laion iri enyenyiruh hapeum. ⁹ Aria mishish um, eshesh shor onog siotog douk dodogowig kabi douk ainab um. Aria esheshish kapraigiyohos shenekoh iri mah douk kabi hwosahos shanuk sabaishi wilkarahos shahur shanak um wanohw iri shenekoh iri mah. ¹⁰ Aria eshesis honus sape kabi douk pupiyagwihiyar um aria sanatuk arpesh. Aria esheshin dодог douk nyape asudok honus um sunatuk eshudok

arpesh um abudok anas wisib aub. ¹¹ Aria eshesh douk enyudok ensel, douk nyasuhw merik um agudok nuwag douk gagor gabuh gani atap iri nyape debeinyi king um eshesh nyasuhw merikwumesh. Enyudok ensel enyeniyin nyeigur douk shahwaren eshesh Hibru esheshin baraan um douk shakri, “Abadon.” Aria eshesh Grik esheshin shakri, “Apollyon.” Aria apak ta mukri “Anudok arman douk nape nanunu ihish enesh-enesh iri.”

¹² Eneshenesh sagomatinyish eshudok douk shenek arpesh shemnek debeiri eriger iri douk shatogur shanak shatuh douk. Aria pumnek, biyesh yoweishi abom kabi douk enyudok nyarik iri douk wata shape, aria eshesh ta shugiguk shutogur.

Anawipin Ensel Nyahapurish Enyeniyihw Oruhw

¹³ Aria anawipin iri ensel nyahapurish enyeniyihw oruhw aria eik yemnek anah mah. Enyudok arpen douk nyeyagwrehi gani anagas um nubatin kona um enyudok alta douk sheneken gol iri. Enyudok alta showem eshudok shenek ofa shako Iruhin um, enyen douk nyatao hurukatin um Iruhin napeum. ¹⁴ Aria enyudok nyeyagwrehi iri nyakrip enyudok anawipin ensel nyasuhw oruhw iri nyakri, “Nyak nyukweshih eshudok nubatish enselahos douk shonoweshik shape abudok debeibi worub nyeiguribum Yufretis iri shunak wosik!”

¹⁵ Aria enyen nyakweshih-esh aria eshesh shasiya ihishmorim arpesh shape agundok atap iri um bisatup awiros. Aria eshesh shabo anap

awirop um eshudok arpesh shagok. Eshudok enselahos eshesh douk Iruhin nenekekesh shenek garibog abom shapeum abudok atub nyutob, ahudok atuh nyumnah, anudok atun aun aria enyudok atin kwar um eshesh shunek enyudok mour. ¹⁶ Aria eik yemnek shadareh amudok soldia douk hatem hwosahos aria hanak heneke wanohw iri um douk sabaimi abom hatogur 200 milion.

¹⁷ Aria eik kabi douk yabo yomnis um aria yatik amudok soldia hatem hwosahos iri hore siotog douk shenekog ainab iri um amamish mishish. Agwudok siotog onog douk owishiborig kabi douk nyih hanu um. Aria onog behrabig, aria onog akitozig kabi douk amudok utom nyeigurim um salfa iri. Aria hwosahos esheshigos baragos sape kabi enesh debeishi wanohwishi mahish nyeigurish um laion iri esheshigos um. Aria nyugwus sani nyih douk hanuwi amudok akitozimi utom nyeigurim um salfa iri shatograri eshudok hwosahos esheshig nokwatog. ¹⁸ Aria eshesh shasiya ihishmorim arpesh um bisatin awiros aria eshesh shabo anap awiropish arpesh shagok. Eshesh douk eshudok bishatin yoweishi abom eshudok, nyih, nyugwus aria ehudok juwehosihhi nyih douk hanuwi amudok utom salfa iri douk shatograri hwosahos esheshig nokwatog iri shaesh shagok. ¹⁹ Eshudok hwosahos esheshin dodog douk nyape esheshig nokwatog gwani honus. Esheshis honus douk sape kabi yuguhw um, aria baragos sapenyesh. Aria eshesh shakwu esheshis honus um shabo arpesh shenekesh sharao debeiri eriger.

²⁰ Aria ihishmorim shapeik iri arpesh douk madae shugok abudok nyutob eshudok yoweishi shatogrumesh abom um obi nyutob, eshesh madae shukutukuk yoweishi inahos uwe, uwok. Eshesh madae shukehuk agabus ehudok aih um shape shenek lotu um sagabehos shani amudok madae adurimi god omi um uwe, uwok. Amudok god omi douk eshesh kanak shenekam esheshis wis iri. Eshesh shenekam shakwu gol rani siliwa iri akitohinyi kapa douk shahwaren um bras iri nyani utabor bani rowos iri. Amam douk madae hutrugun o humnek o hurahaen iri uwe. ²¹ Aria shopunek, eshesh madae shukehuk agabus ehudok yoweihai aih um shabo kupaishi shakwumesh eshudok eneshenesh aria shaesh shagok um uwe, shani ehudok um shenek ouruh um, shani enyudok um shenek enenyenen um subagwiruh um, nyani enyudok um shape shenek wehrur um, nyani enyudok um shakwuaruh um uwe, uwok. Eshesh madae shukutinyukuk aria shatanam shukon aparuh Iruhin uwe.

10

Ensel Nyakon Buk Jon Nakwoh

¹ Enyudok nyanak nyatuhuk aria eik yatigu enen kupainyi dodogowinyi ensel nyakutukuk iruhw heven nyabuhi. Orug gweyor-gwarih enyenyihw yegenyihw. Aria enen renbo nyato iruhw aria enyenyir yamuger rakih rananug, ratem iruhw enyenyig barag. Aria enyenyig yamag gatrugun kabi douk wah hatao hatrugunuk um. Aria enyenyigas aiyas sape kabi

douk nyih hanu jurareh iri um. ² Aria enyen nyasuhw onok shokukwi buk douk shadareshek iri enyenyis wis. Okwudok buk douk kwanejik kwape aria enyen nyasuhwok. Enyenyig yopugi aiyag nyagur gor youg, aria anag nyeshishuk amnab. ³ Aria enyen nyogao aria nyahwar debeg kabi enen debeinyi wanohwinyi mahin nyeigurinyum laion iri nyahwar um. Enyen nyahwar jurug aria utag pogarog 7-poreih. Aria utag geyagwreh kabi douk arpenyi mah um. ⁴ Douk utag geyagwreh 7-poreih jurug, aria eik yenek redi um yakri iwem enyudok baraan um anap shup. Aria eik yemnek anah mah hanaki iruhw heven. Aria enyudok nyeyagwrehi iri nyakri, “Enyudok baraan douk utag geyagwreh 7-poreih gakriyen iri, nyak mare nyunyem, uwok. Enyudok baraan nyumneken nyupe um nyak atin!” ⁵ Aria enyudok ensel douk yatrin nyeyotu youg gwani amnab iri nyatuk enyenyin yopuni rogor nyato iruhw. ⁶ Aria enyen nyakri iruhw um anudok douk nape ihih nyumneh iri ananin nyeigur. Anan douk nenek iruhw atap nani ihish-morim eneshenesh eshudok douk shape iruhw atap iri. Aria shopunek, nenek youg gwani eneshenesh shape shakam-igum iri.

Aria enyen nyakri, “Nyutob batuh, aria Iruhin ta mare nukri nusuhwesh nupe, uwok.” ⁷ Aria enyudok ensel wata shopunek nyakri, “Abudok nyutob douk namba 7 ensel nyahapurish enyenyihw oruhw obi nyutob, eshudok douk seiwok Iruhin nabeshukesh iri ta shunowereh nunekesh shutogur yopugunum. Anan ta nunekesh shutogur yopugunum kabi douk seiwok anan nakripuk

amam profet douk henek ananin mour iri um.”

⁸ Aria eik wata yemnek ahudok atuh mah. Aria enyudok arpen douk iganigadae yemneken nyeyagwreh iruhw heven iri wata shopunek nyakripe nyakri, “Nyak nyunak nyutrin okwudok buk douk kwanajik kwor enyudok ensel douk nyeshish youg gwani amnab iri enyenys wis iri.”

⁹ Aria eik yanak yarigen um nyuke apudok shokwupi shup shadareshap iri. Aria enyen nyakripe nyakri, “Nyak suwap aria nyupoh. Nyupoh pur nokwat um, apap ta ekehip kabi douk araruh um. Aria pubuh pur apahw um ta nyumnek nubut.” ¹⁰ Aria eik yatrinyap aria yapoh. Aria yapoh por nokwat um, eik yemnek ekehip kabi douk araruh um. Aria yapoh pabuh por apahw um, apap wata nubutip. ¹¹ Aria yemnek enen arpen nyakripe nyakri, “Nyak ta nyukripesh enyudok baraen Iruhin nakripen-enyi shopunek. Enyudok baraen douk nyakrium eshudok douk ta kweipon shutogrum sabaishi arpesh douk shape ihigosmorim nahobigos douk sape agundok atap iri. Eshesh shuni sabaishi sisigiruh yegeshiweruh-ish arpesh shuni sabaishi sheneyagwreh kupainyi baraen iri, shuni sabaimi king-omi.”

11

Biom Armam Hakripesh Yopinyi Baraen Iri

¹ Aria enyudok ensel nyeke enen rowog douk shape shasuhw wigah um eshudok eneshenesh iri aria nyakripe nyakri, “Nyak kakitak suh wigah

um Iruhin ananit urupat* tuni alta douk showem um eshudok shenek ofamesh shako Iruhin iri um. Aria shopunek, nyudareh ihishmorim arpesh douk shape shenek lotu numun ananit urupat iri.

² Aria arbudok narub douk bapeik adukehahitam agundok wit um atudok urupat iri nyak mare nyusuhw wigahumat, uwok. Um maresh? Arbudok narub Iruhin nako eshudok arpesh douk madae shudukem Iruhin iri uwe. Aria eshesh ta shushish Iruhin ananibur yopuburi wabur Jerusalem shupeum um 42-poreib aub. Abudok 42-poreib aub douk shopunek atin um bishatin shuknish aria enen tukwanin kwarahos.

³ Aria eik Iruhin ta ishopok eikim biom armam inekam dodogowim atum hunak hukripesh eikin yopinyi baraen. Amam ta hur yoweihirupeh kabi douk yoweigosi begos† um. Eik ta ikripam eikin baraen aria amam ta hunak hukripeshen 1,260-poreih nyumneh. Ehudok 1,260-poreih nyumneh douk shopunek atin um bishatin shuknish aria enen tukwanin kwarahos.”

⁴ Amudok biom armam amam douk shakri wobuwobren baraen um eshudok biyesh rowos nyeiguhwish um oliv iri shani biyesh eshudok douk showem lamhos shetem um douk shakus hurukatin um Debeini douk nasuhw ihibmorim amnab iri.

⁵ Aria ta enesh arpesh shukri shom o shuham um, nyih ta hutograri amamig nokwatog aria hunu amamish horim hiyatesh. Douk namudok aria meishi

* **11:1:** Atudok Iruhin ananit urupat douk takri um Iruhin ananish arpesh. † **11:3:** Amudok biom profet hagipesh esheshih aih hore yoweigosi begos sanahwaram um rupeh um huyabigesh um amam hakri uwok abom um eneshenesh yoweishi inahos eshesh shenekesh iri aria hape hereh.

arpesh shukri shom o shunekam mumam iri, eshesh ta mare shuruwok, uwok. Eshesh shop-unek ta ehudok nyih hunish aria shugok shutuh.

⁶ Amudok biom douk harao big aria dodog um hunek eshah mare hurauri abudok nyutob amam hukripesh Iruhin ananin baraen obi nyutob um. Aria shopunek, amam douk dodogowim um hunek ihibarmorim abar douk bakih atap meyoh iri buni bor worubus sani youg iri um buneneck um owishibor. Aria amam douk dodogowim um hunek eneshenesh yoweishi abom eshudok shutogurum ihishmorim arpesh shunekesh shurao debeiri eriger. Aria douk meibi nyutob amam hukri hunekesh namudok um, amam ta hugipesh amamip atip urkwip.

⁷ Douk kweipon amam ta hukripesh Iruhin ananin baraen hiyaten aria enyudok debeinyi wanohwinyi mahin ta nyukutukuk agudok nuwag douk gagor gabuhuk gani atap iri nyutowi. Enyen ta nyutowi aria nyuto iruhw nyuni amudok biom armam shurpak aria enyen ta dodogowin atin nyom hugok. ⁸ Aria amam ta hukusuk abrudok debeiburi wabur ababih debeihi yah douk seiwok shabo amamin Debeini showeshikan shanaur neir rowog kruse nagok aburi. Abrudok wabur ababish biyesh wobresh nyeiguhw douk Sodom iri Isip. ⁹ Aria bihotih shuknih anah tukwanih nyumneh, sabaishi arpesh shanaki ihismorim awiros douk shape ihigos-morim nahobigos agundok atap iri ta shutrum. Eshesh douk sisigiruh yegeshiweruhish douk sheneyagwreh sabainyi kupainyi baraen iri. Aria eshesh ta mare shukri wosik

um enesh arpesh shumuhur shunak shurumam, uwok. ¹⁰ Aria shape agundok atap iri arpesh ta shunadudareh um agundok amudok biom hagok um. Eshesh ta shunadudareh aria shupe shukesh yopinyi presen um esheshish atin atin arpesh. Um maresh? Amudok biom wata hapeum, amam apa henek sabaishi arpesh shape agundok atap iri shemnek debeiri eriger. ¹¹ Douk bihotih shuknih anah tukwanih nyumneh hunak hudiguk, aria ta Iruhin ananip yap wata panak pawisham aria amam ta wata hukitak hiyotu. Aria arpesh ta shutrum aria shunogugur abom. ¹² Aria abudok nyutob, amudok biom ta humnek anah mah. Aria enyudok arpen nyiyagwrehi iruhw heven iri ta nyukripam debeg nyukri, “Ipak putowi agundok iruhw!” Aria amamish horim ta shiyotu shupe shutrum meyoh aria amam ta huwish onog orug aria hupe huto um iruhw heven.

¹³ Aria ta abudok atub nyutob abom, tak-weikwi enyik ta kwutuk aria sabaishi 7,000-poreish arpesh ta shugok. Aria agundok onok outuk abrudok wabur ta buwishuk aria 9-poreiyu outumeb upeik. Aria eshudok douk shupeik iri ta shutik namudok aria eshesh ta shunogugur abom aria ta shupe shutuk Iruhin douk nape iruhw heven iri ananin nyeigur nyuto iruhw. ¹⁴ Eshudok biyesh yoweishi abom douk shenek arpesh shemnek debeiri eriger iri douk eshudok shatuh. Aria ipak pumnek! Douk ta mare roubi nyutob aria eshudok bishatin yoweishi abom douk ta shunek arpesh shunumnek debeiri eriger iri ta shutogur.

Namba 7 Ensel Nyahapurish Enyeniyihw Oruhw

¹⁵ Douk namba 7 ensel nyahapurish enyeniyihw oruhw aria enesh arpesh sheyagwrehi debeg iruhw heven iri shakri,

“Amudok douk riguk hape debeimi king um agundok atap iri amamih nyumneh douk hatuh.

Douk abudok nyutob apakin Debeini nani Krais, anudok douk Iruhin nagraehan neshopokan nanaki iri douk

hatogur dodogowim atum um hupe king um agundok atap.

Aria Krais ta nupe Debeini nupe nusuhw merik um agundok atap iih nyumneh.”

¹⁶ Aria amudok 24-poreim debeimi douk hetem amamish debeishi wagiturahos hurukatin um Iruhin iri habuh hakus atap aria hape henek lotu um Iruhin. ¹⁷ Aria hakri,

“Debeini dodogowini Iruhin douk seiwok nyape aria douk shopunek nyape!

Apak manadudareh-umen aria menek tenkyumen.

Um maresh? Nyak douk nyarao nyakin debeinyi dodog

aria douk nyananubur nyape king um ihish-morim arpesh

shani eneshenesh eshudok.

¹⁸ Eshudok douk madae shudukemesh um nyak iri uwe,

eshesh juwehosish aria agundok nyak juwehosin um douk natogur.

Aria ahudok nyumnah douk hatogur um shagok iri

wata shukitaki aria nyak nyusuhw esheshig kwotog um.

Aria shopunek um nyukom yopishi eshudok eneshenesh
um amam profet.

Amam huni ihishmorim nyakish arpesh
nyeiguhw shato-umesh iri
shuni nyeiguhw wokeshi douk shanogugur um
nyak aria shenek lotumen iri.

Aria um nyununu eshudok arpesh douk
shape shanunu abudok amnab iri!”

¹⁹ Douk amudok 24-poreim debeimi hakriyuk namudok jurug aria Iruhin ananit debeiti urupat tatao iruhw heven iri tanajik. Aria asudok bogis douk dodogowinyi baraen kontrak Iruhin nakrip eshesh Israel enyi nyor um sakusi yopugunum gani numun urupat. Aria utag pogarog geyag-wreh aria gatrugun abom. Aria eik yemnek anah debeihi mah. Aria enyik kwatuk aria sabaisi debeisi shigorihwisi ais kabi douk utabor-umori sagruki atap.

12

Armatok Kwani Debeiri Yur

¹ Aria shatik um enen dodogowinyi abom kak um shutrin aria shudukemesh shukri enen dodogowinyi arpen hurukatin um nyutogur. Enyudok kak nyanakwarum nyatogur nyape iruhw heven. Aria nyatograri iri kak douk enyudok. Onok armatok kwape aria okwok kwashok nyumnahin aun kabi douk rupah um. Aria wabin nape shakameruh um okwokwiruh

yeriweruh. Aria kowem anat yoputi hat douk 12-poreiyu unib wapenyat iri kabi douk debeiwori otu wogwem iri um okwokwig barag. ² Aria okwok douk kwonarahaen aria kwave kwabirak um kwakri kwubanuh aria kwareh kwah-war debeg. ³ Aria wata shopunek, kupainyi dodogowinyi kak nyanakwarum nyatogur nyape iruhw heven. Aria nyatograri douk enyudok. Enen dedebeinyi owishiborinyi mahin kabi douk anar takweiri yur um nyanakwarum nyatogur nyape. Enyen 7-poreigos baragos seiren aria 10-poreiruh shuworuh hakihen barag. Aria 7-poreig yopugwi hatog douk debeimi atum hogwem iri gwatem atug atug um enyenyigos baragos. ⁴ Aria enyen nyakwu enyenyip honup nyogat unib douk wape atugun um onok outuk iri gani iruhw utag aria nyawasho wagrukuki atap. Aria bio outumeb um unib wapeik iruhw utag. Aria enyen nyanak nyeyotu apahwik um okwudok armatok douk hurukatin um kubuki batowin iri um nyakri kadak okwok kwunyubuki atin aria enyen arigas nyunyuhur nyunyoh. ⁵ Aria okwok kwabanhuh kwabuki armanin batowin. Anudok arman kweipon ta nupe dodogowin atun aria ta nusuhw ainim butum aria nupe debeini um ihishmorim arpesh douk shape ihigos-morim nahobigos iri. Douk okwok kwanabuki aria eshesh shatrukwan sharan shanak um Iruhin um ananin debeinyi yopunyi wagitur douk anan napenyen iri. ⁶ Aria okwok kwaruwok kwanak um anabik wehigunum arpesh uwok um. Okwok kwanak um agundok douk Iruhin nenekagunumok um kwunak kwupeum. Aria agundok es-

hesh ta shupe shutaurumok kwupe 1,260-poreih nyumneh. Ehudok 1,260-poreih nyumneh douk shopunek atin um bishatin shuknish aria enen tukwanin kwarahos.

⁷ Aria debeihwi wanohw hwatogur iruhw heven. Enyudok debeini Iruhin ananin ensel douk nyanahwar um Maikel iri nyani enyenish enselahos shabo arudok debeiri yur. Aria arudok yur shopunek rani ararish yoweishi enselahos wata shatanam shawanam wanohw.

⁸ Douk eshesh sharpak aria yur rani ararish enselahos madae dodogowish uwe. Aria eshesh madae anabik uwe um shupe iruhw heven um. ⁹ Aria Iruhin ananish enselahos shasuhwesh shawashesh shabuhi atap. Arudok yur douk seiwok rape aria douk shopunek rape iri. Arar douk shahwaror um yoweini sagaben o Satan. Anan douk nepe neneh rohw um ihishmorim arpesh douk shape agundok atap iri. Anan nani ananish yoweishi enselahos, eshesh douk showashesh shagruki agundok atap.

¹⁰ Aria eik yemnek anah debeihi mah. Aria enyudok arpen nyeyagwrehi debeihi mah gani iruhw heven iri nyakri,

“Douk agundok um Iruhin narap
matanamori mape wosik um douk nanaki.
Aria Iruhin neyabigap um anan douk dodogowini

abom

aria ta nupe king um apak ihih nyumneh!

Aria douk Krais, Iruhin nagraehan

aria neshopokan nanakumori nurao arpesh iri
douk

neyabigap um anan douk dodogowini

aria ananin big nyatogur deben.

Um maresh? Arudok yur douk reyotu rape
renekumesh rohwin baraan eshesh Kris-
ten,

rakrip apakin Iruhin nyumnah wab
rakri eshesh shenek yoweihi aih iri arar douk
Iruhin ananish enselahos shawashor
rakutukuk iruhw heven ragruki agundok atap.

¹¹ Aria apakish ashukenyish owashish douk
shagipesh Krais iri
shenek uhwinyumor.

Um maresh? Eshesh shape dodogowish um
enyudok Nugaen Sipsip douk
seiwock shaen nyagok iri enyenibor owichibor
bani enyenin adurin baraan douk eshesh
shakripeshen iri.

Esheship urkwip douk por abom um shakri
shukripesh enyudok adurin baraan
aria eshesh madae urkwip purum shukri
shupe wosik agundok atap um uwe.

Aria shopunek, eshesh madae shunogugur um
kupaishi arpesh douk
shakon agabus Iruhin iri shesh shugok um uwe.

¹² Douk namudok aria ipak pape iruhw heven iri
puni iruhw utag, ipak ta punadudareh.

Aria ipak pape atap pani youg iri eik yakri giha-
umep,

ipak ta pumnek debeiri eriger.

Um maresh? Satan douk nagrukugu um ipak.

Aria anan douk juwehosin abom. Um maresh?

Anan nadukemesh um anan nupe nurahaen obi
nyutob douk banab abom meyoh.”

¹³ Aria douk arudok debeiri yur ratik um
eshesh shawashor ragruki agundok atap um,

aria arar rape rahiayah okwudok armatok douk kwabanuh kwabuki nunganin iri. ¹⁴ Aria eshesh shokok biyesh debeishi kumunish kapraigiyohos um kwehuru. Aria okwok kwanadudareh kwanak gani wehigunum arpesh uwok um. Okwok kwanak agundok um eshesh shupe shutaurumok eshudok bishatin shuknish aria enen tukwanin kwarahos um arudok yur mare rok. ¹⁵ Aria sabaibari abar batograri ararit nokwat aria batogur banak. Ababar bagipesok banak kabi douk worub batogur banak um. Um arar rakri kadak abrudok abar bunak aria burraok bunak bok kwugok. ¹⁶ Aria amnab bataurumok. Aria amnab puwarob banak tukwotukwan aria abrudok abar bagrukuk atap. ¹⁷⁻¹⁸ Aria arar juwehosir abom um okwudok armatok aria ranak um rakri runi ihishmorim okwokwish batowish aria barheshish shurpak. Eshesh douk eshudok ihishmorim arpesh douk shagipesh Iruhin ananin lo aria shakripesh Jisas ananin adurin atinyi baraen aria shagipeshen iri.

13

¹ Aria arar ranak reyotu anagas um youg.

Biyesh Debeishi Wanarish Mahish

Aria eik yatigu enen debeinyi mahin nyape urah iri nyakutukuk youg nyakitak nyape nya-towi. Enyen 10-poreiruh shuworuh hakihen aria 7-poreigos baragos seiren. Aria 10-poreig yopugwi hatog douk debeimi atum hogwem iri gwatem otuhw otuhw um arhudok shuworuh. Aria enen yoweinyi nyeigur nyetem enyudok mahin enyenyigos baragos. Baugenym baraen um

enyudok nyeigur douk shabubunim um Iruhin.
² Enyudok mahin douk nyape kabi enen debeinyi wanohwinyi mahin douk shahwaren um lepat iri. Aria enyenyigas aiyas sape kabi enen debeinyi wanohwinyi mahin shahwaren um bea iri. Aria enyenyit nokwat kabi douk enyudok debeinyi wanohwinyi mahin douk nyanahwar um laion iri enyenyit um. Aria arudok yur reken ararin dodog aria big nyani ararin debeinyi yopuniyi wagitur um enyudok debeinyi mahin.
³ Aria anag um enyudok mahin enyenyig barag, takweibi arab bapenyag kabi douk shaen nyagok um. Aria enyen douk madae nyugok uwe, uwok. Abab wata banakawis. Douk namudok aria ihishmorim arpesh shape agundok atap iri shakitak yowiyokuk um enyudok mahin aria shagipeshen.
⁴ Aria arudok yur douk reken ararin big um enyudok mahin. Douk namudok aria ihishmorim arpesh shenek lotu um arudok yur. Aria eshesh shenek lotu um enyudok mahin shopunek shakri, “Arpen douk madae enen dodogowin kabi douk enyudok mahin um uwe, uwok. Enyen atin douk dodogowin abom. Aria ta omi dodogowin um nyuni enyen shurpak?”

⁵ Aria Iruhin nakri wosik nape natrin meyoh enyudok mahin um enyen nyupe debeinyi um sabaishi arpesh um 42-poreib aub. Abudok 42-poreib aub douk shopunek atin um bishatin shuknish aria enen tukwanin kwarahos. Aria enyen nyape nyeyagwreh enenyenen yoweinyi abom baraen aria nyape nyatuk enyenyin nyeigur nyato iruhw. ⁶ Aria enyen nyanonubur nyape nyabubunim um Iruhin. Enyen

nyabubunim um ananin nyeigur nyani ananibur wabur bani eshudok arpesh douk shape iruhw heven iri. ⁷ Aria Iruhin neken dodog aria enyen nyani Iruhin ananish arpesh sharpak aria enyen nyaesh nyahiyahesh. Aria enyen nyarao debeinyi big um nyupe king um ihishmorim arpesh shape ihigos-morim nahobigos iri. Shuni ihismorim debeisi awirosish, shuni ihishmorim sheneyagwreh ihin kupainyi baraen iri, shuni ihishmorim ihiruh sisigiruh yegeshiweruhish arpesh. ⁸ Aria ihishmorim arpesh douk shape agundok atap iri ta shunek lotu um enyudok mahin. Ihishmorim eshudok arpesh douk seiwok Iruhin madae nunek agundok atap uwe, aria anan madae nuwem um esheshish nyeiguhw shutem okwudok buk douk eshudok arpesh ta shupe wosik ihih nyumneh iri esheshish nyeiguhw shutemokwi. Okwudok buk douk enyudok Nugaen Sipsip douk seiwok shaen nyagok iri enyenyik. ⁹ Aria douk ipak arigos sapenyep iri um, ta gamo pumnek enyudok baraen!

¹⁰ Eshudok arpesh douk Iruhin nukri wosik um kupaishi

shusuhwesh shuweshikesh shuraesh um shunuweshik iri,

eshesh ta shunuweshik.

Aria eshudok douk Iruhin nukri wosik um ku-paishi

shukwumesh bainatog iri,

eshesh ta shukwumesh bainatog aria shesh shugok.

Adur atin, enyudok kweipon ta nyutogur.

Namudok aria ipak Iruhin ananish arpesh ta pusuhw ananin baraeñ dodog pugipeshen aria piyotu dodogowip atip abudok nyutob enyudok-mori amaen nyutogrumeñ um.

¹¹ Aria eik yatigu enen kupainyi debeinyi wanarin mahin shopunek. Enyen douk nyape iri gani atap nuwag iri nyakitak nyapa nyatowi. Enyen bioruh shuworuh kabi douk hatogur nugaen sipsip iri hakih baragenyum. Aria enyen nyeyagwreh kabi douk yuguhw hweyagwreh um. ¹² Aria enyen nyakwu enyudok nyarik iri mahin enyenyin big aria dodog um nyupe debeinyi um ihishmorim arpesh. Aria shopunek um nyupe dodogowin atin aria nyunek agundok atap nini ihishmorim arpesh shunek lotu um enyudok nyarik iri mahin douk takweiti nyubrut tape anag enyenyig barag kabi douk shaen nyagok iri um. Aria enyen madae nyugok uwe, uwok. Aria abab banakawis. ¹³ Enyudok nyagiguk iri mahin nyenek enen mour douk Iruhin atun neneken iri agundok nabesish um ihishmorim arpesh. Enyen nyeneken iri douk enyudok. Enyen nyenek nyih hakutukuk iruhw heven hagruki agundok atap. ¹⁴ Aria Iruhin nakri wosik aria enyen nyenek sabainyi Iruhin atun neneken iri mour agundok nabesin um enyudok nyarik iri mahin. Douk enyen nyeneksh namudok aria enyen nyape nyenek rohw um ihishmorim arpesh shape agundok atap iri. Aria enyen nyape dodogowin atin aria nyakripesh um shunek enyudok nyarik iri mahin enyenyir aborir aria shupe shutuk enyenyin nyeigur nyuto iruhw. Enyen douk seiwok shaen shakwumen

bainat aria enyen madae nyugok iri uwe. Enyen wata nyape. ¹⁵ Aria Iruhin nakri wosik aria enyudok nyagiguk iri mahin nyahapurish enyenyip yap pawish enyudok nyarik iri mahin enyenyir aborir douk eshesh shenegor iri aria nyorukar yapis. Enyen nyenekar namudok um riyagwreh aria runek eshudok arpesh douk shakri uwok um shunek lotumar iri shugok. ¹⁶ Aria enyen dodogowin atin abom um nyakri ihishmorim arpesh, nyeiguhw shato-umesh iri,* shuni nyeiguhw wokeshi, shuni shanagrem sabaishi eshudok eneshenesh iri, shuni yaruhibh iri, shuni shape shakamum kupaishi shenekumesh mour meyoh iri, shuni shape wosik iri um shurao enen kak nyupe esheshish domaesh o esheshish yopishi roguhw. ¹⁷ Enyen nyenekesh namudok um meinyi arpen douk mare nyurao enyudok kak o enyudok namba iri, enyen ta mare nyutor eshudok eneshenesh o nyunek salimesh um kupaishi shutorish, uwok. Enyudok namba o kak douk nyakri wobuwobren baraen um enyudok mahin enyenyin nyeigur.

¹⁸ Apak ta murao saki um mudukemesh um baugenyum baraen um enyudok namba. Enyudok arpen douk nyudukemesh abom iri enyen ta nyudukemesh um baugenyum baraen um enyudok namba. Um maresh? Enyudok namba douk nyakrium anan arman ananin nyeigur. Aria enyudok namba douk 666.

14

* **13:16:** Putik futnot nyape Revelesen 11:18 iri.

*Sabaishi 144,000-poreish Arpesh Sheyarub
Onohw Namuhwi Awehw*

¹ Aria eik Jon wata yatrugunugu aria yatigu nugaen Sipsip nyeyotu ahwudok yoduhw douk shahwarohw um Saion iri. Enyen nyani sabaishi 144,000-poreish armam armago douk enyudok Nugaen Sipsip nyani enyenyin Yain amamish nyeiguhw shetem esheshish domaesh iri sheyotu.

² Aria eik yemnek anah mah hanaki iruhw heven kabi douk debeibi worub batogur debeg um. Aria shopunek, ahah kabi douk utag pogarog debeg um. Ahudok mah eik yemnekah iri ahah douk kabi yopuhi mah douk shabirak eshudok kabi gitahas um iri shabirakesh shenekah iri.

³ Aria eshudok sabaishi 144,000-poreish arpesh sheyotu hurukatin um Iruhin ananin debeinyi wagitur nyani amam debeimi hani eshudok nubatish dodogowishi douk mishish shoresh iri shapeum. Aria eshesh sheyarub onohw namuhwi awehw douk eshesh Jisas Krais nagrae-hesh aria naraesh shakutukuk agundok atap iri atish shadukemohw iri. ⁴ Anam armam um eshudok arpesh douk henek yopinyi atin iri. Enesh douk armam henek yopishi inahos atin iri. Amam madae hunek yoweih iah um huni armago shenek wehrur atin uwe, uwok. Amam hape yopumi armam. Aria hagipesh Nugaen Sipsip hanak ihigunum enyen nyanak um. Aria orokohun um eshudok arpesh shape agundok atap iri, Iruhin nator amudok harik iri armam naram hanakum anan nani Nugaen Sipsip kabi douk ofa um. ⁵ Amam madae enen baraen nyupenyam um henek eneh yoweih iah um uwe.

Aria shopunek, amam madae hunek rohw atin uwe, uwok.

Iruhin Ananish Bishatin Enselahos Sheneyag-wreh Shakri Enen Baraen

⁶ Aria eik yatik enen ensel nyehwuru nyanak gani iruhw iri nyasuhw Iruhin ananin yopinyi baraen douk ta nyupe iihih nyumneh iri um nyukrip ihishmorim arpesh shape agundok atap iri. Enyen ta nyukrip ihiruhmorim sisigiruh yegeshiweruhish arpesh, shuni ihismorim sisigis awirosish arpesh, shuni ihishmorim sheneyag-wreh kupainyi baraen iri, shuni ihishmorim arpesh douk shape ihigosmorim nahobigos iri.

⁷ Aria enyen nyahwar debeg nyakri, “Nyutob banaki um Iruhin anudok debeini jas um nuneck skelimum ihishmorim arpesh um. Namudok aria ipak punogugur um anan aria putuk ananin nyeigur nyuto iruhw! Ipak punek lotu um Iruhin douk neneck iruhw heven nani agundok atap nani youg gwani ihibarmorim abar douk batogur atap meyoh iri.” ⁸ Aria nyagiguk iri nyehwuru nyanaki aria nyakri, “Abrudok debeiburi wabur nyeigur nyato iruhw aburi Babilon bananukuk jurug! Adur ababur bananukuk iyoh! Arpesh shape Babilon iri riguk shenek ihishmorim arpesh shape ihigos-morim nahobigos iri shenek wehrur um aria shenek eneheneh yoweishi aih. Eshesh shenek ehudok yoweishi aih kabi douk eshesh shape Babilon iri shekesh dodogowibari wainibar abar shaboroh shagugak aria shenekeh iri um.” ⁹⁻¹⁰ Aria enyudok binyatin iri ensel douk nyagipesh eshudok biyesh sharik iri enselahos iri

nyahwar debeg nyakri, “Ihishmorim arpesh douk shenek lotu um enyudok debeinyi mahin nyani enyenyir aborir aria sharao enyenyin kak nyape esheshish domaesh o esheshish roguhw iri ta shuwok anan kupaini wain. Anudok wain douk nakri wobuwobren baraen um agundok Iruhin anan juwehosin um douk ta nunekesh shumnek debeiri eriger iri. Aria anan ta mare nukri nenek gishaumesh, uwok. Anan ta juwehosin-umesh abom aria nunekesh shumnek debeiri eriger um nuwanamesh eneshenesh yoweishi inahos eshesh shape shenekesh iri. Aria Iruhin ananish enselahos shuni Nugaen Sipsip ta shiyotu shutrish aria eshesh ta debeihi nyih hunish. Ehudok nyih douk hanuwi anab akitohibi amnab nyeigurib um salfa iri. ¹¹ Aria nyugus douk sakih ehudok nyih douk hanu eshudok arpesh shemnek debeiri eriger iri ta sukih suto iih nyumneh. Aria eshudok arpesh douk shenek lotu um enyudok debeinyi mahin nyani enyenyir aborir aria sharao enyenyin kak douk nyakrium enyenyin nyeigur iri, nyumneh weibus eshesh ta mare shupe um shurao uhwin, uwok. Eshesh ta shupe um shumnek debeiri eriger namudok atin.”

¹² Namudok aria Iruhin ananishi arpesh douk shagipesh ananin lo aria shenek bilip dodogowish atish um Jisas iri, eshesh ta shiyotu dodogowish atish abudok nyutob eshesh shumnek debeiri eriger obi nyutob um.

¹³ Aria yemneku anah mah. Aria enyudok arpen nyeyagwrehi iruhw heven iri nyakri, “Nyak wem enyudok baraen anap shup um es-

hudok douk shasuhwen dodog Debeini ananin baraeen shagipeshen iri. Baraen enyudok, ‘Eshudok douk shatukur Debeini aria shugok shunak iri shuni eshudok douk ta kweipon shugok iri, eshesh ta shupe wosik aria ta shunududareh! ”

Aria Iruhin ananin Mishin shopunek nyakri, “Adur, eshesh ta shukutukuk ihinyumorim debeinyi mour eshesh shape sheneken iri aria ta wata shupe um shurao uhwin shupe meyoh. Um maresh? Eshesh ta mare shunak meyoh, uwok. Ehudok yopihaih aria mour eshesh shape sheneken iri ta nyunamesh nyunak. Aria Iruhin ta nukesh enesh yopishi eshudok eneshenesh um ehudok aih aria mour eshesh sheneken iri.”

Shaurimori Worigun Agundok Atap Um

¹⁴ Aria wata shopunek yatrugunugu aria yatik onog shigorihwigwi orug. Aria enen arpen nyetemori ogwudok orug. Enyen nyape kabi “Anudok Arman douk natogur adurinyi arpen iri.” Anan nowem anat yoputi hat shenekat um gol iri douk debeimi atum hogwem iri amamigos baragos. Aria nasuhw anap wanohwip atupi ponodaresh iri nogwotep ananis wis. ¹⁵ Aria kupainyi ensel nyatograri atudok Iruhin ananit debeiti urupat aria nyahwaran debeg anudok natem ogwudok orug iri nyakri, “Nyak nyukwu nopudok nogwotep nyurimori worigun. Um maresh? Ahudok nyumnah um worigun nunourimori um agundok atap um douk hatogur.”

¹⁶ Aria anudok arman natem ogwudok orug iri nawashak ananip nogwotep pabuhi agundok atap aria nabre ihigunmorim worigun.

¹⁷ Aria kupainyi ensel nyatograri atudok Iruhin ananit debeiti urupat gani iruhw heven. Aria enyen shopunek nyasuhw anap wanohwip atupi ponodaresh iri nogwotep. ¹⁸ Aria enen kupainyi ensel shopunek douk nyape nyasuhw merik um nyih iri nyatograri gani enyudok alta douk showem eshudok shako Iruhin iri um nyakus um. Aria enyen nyahwaren debeg enyudok douk nyasuhw wanohwipi nogwotep iri nyakri, “Nyak nyukwu nyakip nogwotep nyubre epudok wainip shuruwep douk peir anaruh madururuh douk hanahwar um wain iri um agundok atap. Um maresh? Epep douk buwarep!” ¹⁹ Aria enyudok ensel nyawashak enyenyip nogwotep pabuhi um agundok atap aria nyubre epudok ihipmorim shuruwep. Aria nyepuhur nyanak nyowashep pabuhuk anag debeigi tenk douk shenekag utabor iri um shumakwiyeshep aria shunek wainibar abar. Enyudok wobuwobren baraen douk nyakrium agundok Iruhin anan juwehosin um eshudok arpesh douk shape shenek yoweihai aih iri. ²⁰ Aria anudok wain eshesh shanak shamakwiyeshan agudok tenk adukehahibur um abrudok debeiburi wabur. Aria sabaibori owishibor douk batograri adukehahig um agudok tenk iri bawori banak rougun wosik um 300 kilomita. Aria abrudok sabaibori owishibor hurigasarubor bato um douk wosik hurukatin um 2 mita. Enyudok wobuwobren baraen douk nyakrium agundok Iruhin anan juwehosin um eshudok arpesh douk shape shenek yoweihai aih iri.

*Iruhin Ananish 7-poreish Enselahos Shasuhw
Eshudok Douk Shenek Arpesh Shemnek Debeiri
Eriger Um*

¹ Aria eik wata shopunek yatik kupainyi debeinyi kak nyatogur iruhw heven. Enyen douk nyatogur um nyiyabig arpesh um agundok douk Iruhin dodogowin um nini agundok anan juwehosin um eshudok yoweishi inahos arpesh shenekesh iri um. Aria eik yape yanisorik um enyudok kak. Kak douk enyudok. Eik yatik 7-poreish Iruhin ananish enselahos douk shasuhw 7-poreish shagiguk abom iri eshudok enesh-enesh um shunek arpesh shumnek debeiri eriger iri. Eshudok yoweishi eneshenesh, eshesh douk shagiguk abom iri. Um maresh? Abudok nyutob ta shubo eshudok arpesh douk shape agundok atap iri ba iyoh, aria agundok Iruhin anan juwehosin abom um ta nutuh. ² Aria eik yatik enen enyudok douk nyape kabi youg-mori um. Enyen nyape kabi wenyir, douk shenegor rani nyih iri. Aria shopunek, eik yatik enesh arpesh sheyotu anagas um youg. Eshudok arpesh eshesh douk sheyotu dodogowish shenek uhwinyum wanohw shabo enyudok debeinyi mahin iri. Aria shopunek, eshesh shenek uhwinyum enyenyir aborir rani namba douk nyakri wobuwobren baraeum enyenyin nyeigur iri. Aria eshesh shasuhw eshudok kabi gitahas um douk Iruhin nekeshesh iri. ³ Aria eshesh shape sheyarub ahwudok awehw douk neneck Iruhin ananin mour iri Moses nani Nugaen Sipsip amamihw. Ahwudok awehw douk sheyarub shakri namudok,

“Debeini Iruhin, nyak douk dodogowinyi abom

aria nyabo ihishmorim eneshenesh shabuhuk iri.
Nyakih aih douk yopiyopihi abom.

Aria nyakin mour douk dodogowinyi abom
aria arpesh shatrin aria mishish shakitak
yowiyokuk!

Nyak nyape King um ihigos-morim nahobigos
douk
sape agundok atap iri.

Aria nyak nyenekeh iri aih aria mour douk
adurin atin abom!

⁴ Debeini, ta omi mare nyunogugur um nyunek
lotumen?

Aria ta omi nyukri uwok um
nyutuk nyakin debeinyi nyeigur nyuto iruhw?
Nyak atin yopunyi abom.

Aria ihishmorim arpesh shape ihigos-morim na-
hobigos iri

ta shunaki shunek lotu um nyak atin.

Um maresh? Nyakin ihinyumorim yopinyi mour
iri aih douk shatogur yopugunum.”

⁵ Douk enyudok nyanakuk aria yatigu atudok
Iruhin ananit debeiti urupat gani iruhw heven
tanajik. Aria eik yatigu numunitum atudok selit
urupat douk Iruhin napenyot iri. ⁶ Aria Iruhin
ananish 7-poreish enselahos douk shasuhw 7-
poreish yoweishi eshudok eneshenesh iri shaki-
tak shatograri atudok urupat. Eshudok yoweishi
douk ta shunek arpesh shumnek debeiri eriger
iri. Eshesh shorari yopihi atih hatrugun iri shig-
orihiwihi rupeh. Aria shawashak iri letog douk
shenekog gol iri um esheshish mishish. ⁷ Aria
enen um eshudok nubatish dodogowishi douk
mishish shoresh iri nyekesh 7-poreis dis douk

shenekas gol iri um eshudok enselahos. Asudok dis douk shishuknis um Iruhin douk nape iih nyumneh iri um anan juwehosin um. ⁸ Aria atudok Iruhin ananit debeiti urupat shuknit um ogwusudok yopugwusi nyugwus douk satograri agundok douk Iruhin dodogowin aria natrugun abom um. Aria abudok nyutob, madae enen arpen ta dodogowin um nyunak nyuwish um uwe, uwok. Enyen ta nyupe arigaha eshudok 7-poreish enselahos shiyatak enyudok mour um eshudok 7-poreish yoweishi douk shenek arpesh shemnek debeiri eriger iri ba iyoh, aria enyen wosik ta kadak nyunak nyuwish.

16

7-poreis Dis Douk Shukunis Um Eshudok Douk Iruhin Juwehosin-umesh Abom Um

¹ Aria eik yemnek anah mah. Aria enen arpen nyeyagwrehi atudok Iruhin ananit debeiti urupat. Aria enyudok nyeyagwrehi iri nyakrip eshudok 7-poreish enselahos debeg nyakri, “Ipak punak purak Iruhin anan juwehosin um nyor ipakis dis iri nyubuhukuk atap!”

² Aria nyarik iri ensel nyanak nyourak eshudok shor enyenys dis iri shabuhukuk atap. Aria takwetakweibi yoweibi ereb batogur um enesh arpesh. Ebeb douk batogur um ihish-morim douk sharao enyudok debeinyi mahin enyenyn kak nyape esheshish roguhw shani domaesh aria shenek lotu um enyenyr aborir iri. ³ Aria nyagiguk iri ensel nyaurak eshudok shor enyenys dis iri shabuhukuk youg aria youg

gwatanam gwanenem um owishibor kabi douk shagok iri arpesh esheshibor um. Aria ihishmorim eshudok shape youg iri shagok. ⁴ Aria binyatin iri ensel nyaurak eshudok shor enyenyis dis iri shabuhukuk worubus aria ihibarmorim abar douk batogur atap meyoh iri batanam banenem um owishibor atubor. ⁵ Aria eik yemnek enyudok ensel douk nyasuhw merik um ihibarmorim abar iri nyakri,

“Nyak adurinyi. Seiwok baugos abom um nyak nyape,
aria douk shopunek nyape.

Baraen nyak nyeneken um eshudok arpesh douk shenek yoweishi inahos iri douk yopin abom.
Eshesh shemnek debeiri eriger wosik um yoweishi inahos eshesh shenekesh iri.

⁶ Um maresh? Eshesh shabo nyakish arpesh shani amam profet

douk Iruhin nakripam baraen hakrip arpesh iri shagok

aria esheshibor owishibor batourak.

Aria ahudok nyumnah douk nyak nyuwanam-umesh

eshudok shenek yoweishi inahos iri shaboroh.

Abrudok owishibor douk bakri wobuwobren baraen um

arudok debeiri eriger douk Iruhin nenekekesh shemnegor iri.

Aria arar douk renekesh-umesh wosik um eshudok yoweishi inahos eshesh shape shenekesh iri.”

⁷ Aria eik yemneku enen arpen nyeyagwrehi enyudok alta douk shape showem eshudok

shenek ofamesh shako Iruhin iri nyataoum. Aria enyudok arpen nyeyagwrehi iri nyakri,
“Debeini, nyak douk Dodogowini abom Iruhin.
Nyak nyeneken um arpesh iri baraen douk yopin
abom!”

⁸ Aria enyudok nubatin iri ensel nyaaurak es-hudok shor enyenyis dis iri um nyumnahin aun. Aria Iruhin nakri wosik aria wah hatao juwehosih atuh habo arpesh aria nyih hanish. ⁹ Aria ahudok wah hatao juwehosih atuh abom aria habo enesh arpesh aria shanomnek abom um debeihi nyih hanishuk. Aria eshesh shape shahao Iruhin shabubuniman anan douk nasuhw merik um eshudok yoweishi douk shenek arpesh shemnek debeiri eriger iri. Aria eshesh shakri uwok abom um shatanam shukon aparuh Iruhin aria shutuk ananin nyeigur nyuto iruhw um. ¹⁰ Aria enyudok anas wisin iri ensel nyaaurak eshudok shor enyenyis dis iri shanak um enyudok de-beinyi mahin nyapenyen iri wagitur nyakus um. Aria wab babuh beyawiyamuk agundok ihish-morim arpesh douk enyen nyasuhw merikwumesh iri shapeum. Eshesh shapeum arukwutigun abom. Aria eshesh shemnek debeiri eriger aria sabaibi erek bapenyesh aria shape shanatuk esheship yehep. ¹¹ Aria shape shabubunim Iruhin douk nape iruhw heven iri. Aria eshesh madae shukehuk agabus ehudok yoweihai aih eshesh shape shenekeh iri uwe, aria shatanam shukon aparuh Iruhin uwe, uwok.

¹² Aria enyudok anawipin iri ensel nyaaurak eshudok shor enyenyis dis iri um abudok de-beibi worub nyeiguribum Yufretis iri. Aria

abar bogerukuk abom um shugabemam yah amam king-omi douk ta hunaki gani aun naki-humori. ¹³ Aria eik yatigu bishatin shanabosusih iri yoweishi sagabehos douk shape kabi makihos um. Eshesh shatograri arudok debeiri yur rani enyudok debeinyi mahin shani anudok nenek rohwumesh iri profet esheshig nokwatog. ¹⁴ Eshesh douk bishatin eshudok yoweishi abom sagabehos douk shape shenek enenyenen mour kabi douk Iruhin atun nepe neneken iri. Aria eshudok bishatin iri yoweishi sagabehos ta shunak shurauri ihm-morim king douk hape ihigunum um agundok atap iri um hunaki hupe atugun aria huni dodogowini Iruhin douk nasuhw ihinyumorim dodog iri hurpak ahudok ananah debeihi nyumnah.

¹⁵ Aria Jisas Krais nakri, “Ipak mnek, eik ta wata inaku itogrump kabi douk nakwuaruh iri nanakumogu. Douk namudok aria eshudok arpesh douk mare shishuh aria shugabe shunabuk esheshih rupeh wosik iri, eshesh ta shunadudareh shupe wosik. Um maresh? Eshesh ta mare shugar shupe shurahaen shunak yopugunum aria abraen nyesh, uwok!”

¹⁶ Aria eshudok yoweishi sagabehos shurauri amudok debeimi king hanaki hape agundok douk baraen Hibru shahwaragun um Amagedon iri.

¹⁷ Aria namba 7 ensel nyaurak eshudok shor enyenyis dis iri shanak um utag. Aria eik yemnek anah mah. Enyudok arpen nyeyagwrehi numun Iruhin ananit debeiti urupat douk Iruhin ananin yopuniyi wagitur nyakus um. Aria enyudok arpen nyeyagwrehi iri nyahwar debeg nyakri,

“Douk eshudok shatuh!” ¹⁸ Aria utag pogarog geyagwreh debeg aria gatrugun abom. Aria debeikwi enyik kwatuk. Douk seiwok agundok atap arpesh shape shanaki arigaha douk aria madae onok okudokmori debeikwi enyik kwutuk uwe! ¹⁹ Aria abrudok debeiburi wabur banasiya um bihatuh-igunum. Aria ihirubmorim debeirubi warub bape ihigos-morim nahobigos agundok atap iri bananukuk. Aria Iruhin urkum morum eshesh shape abrudok debeiburi wabur Babilon iri aria nekesh anudok wain douk shakri wobuwobren baraen um anan juwehosin abom um aria shano. ²⁰ Aria ihishmorim unaihos shani ihiruhmorim yodururuh burukwaresh-ukuk aria shanak shawishuk abom. ²¹ Aria shigorihwisi ais kabi douk utabor um sagruki iruhw utag kabi douk eshah harari um aria sabuhi saesh. Abrudok aisibor utabor douk amaenyibor abom. Ababor atum atum douk 50 kilogram. Aria douk enyudok yoweinyi abom um abrudok aisibor utabor babuhi baesh shemnek debeiri eriger um nyenekesh aria shape shabubunim um Iruhin. Um maresh? Enyen douk yoweinyi abom.

17

Debeikwi Armatok Douk Kwani Kupaimi Shenek Wehrur Iri Kwonnek Debeiri Eriger

¹ Aria enen um eshudok 7-poreish enselahos douk shasuhw asudok 7-poreis dis douk shuknis um Iruhin anan juwehosin-umesh abom um nyanakumori eik aria nyakripe nyakri, “Nyak yowi aria iyabigen um agundok ta okwudok debeikwi armatok douk kwani kupaimi shenek

wehrur iri kwumnek debeiri eriger um okwok-wih yoweih iah um. Okwok douk kwape hrukatin um sabaibusi debeibusi worubus.² Aria king omi* douk hape agundok atap iri hani okwok shenek wehrur um. Aria sabaishi arpesh shape agundok atap iri shawok okwokwin wain aria shagugak. Anudok wain douk shakri wobuwobren baraen um okwokwihi yoweih iah.”

³ Aria Iruhin ananin mishin nyatogrume dodogowin atin. Aria enyudok ensel nyarae nyanak anagun wehigunum arpesh uwok um. Aria agundok eik yatik onok armatok kwatem iruhw um enen debeinyi owishiborinyi wanarin mahin. Enyudok mahin 7-poreigos baragos seiren aria 10-poreiruh shuworuh hakihen. Aria sabaishi nyeiguhw shatem ihihwmorim enyenyihw yegenyihw. Eshudok nyeiguhw douk shabubunim um Iruhin.⁴ Aria okwudok armatok kwenek biyeh yomogih owishiborihi rupeh. Okwok kwanaginohw okwokwihi yegenyihw um sabaibi yamayamagib batrugun iri weiyoub douk shenekab gol iri. Aria shopunek, anab douk shenekab anabor yopubori utabor bani anab weiyoub douk shatorub debeibori utabor iri. Aria kwasuhw anap kap shenekab gol iri okwokwis wis. Aria eneheneh yoweih iah douk Iruhin nakri wokumeh abom iri hani eneheneh yoweih iah um shani okwudok armatok shenek wehrur um hor apudok kap shuknip.⁵ Aria

* **17:2:** Enyudok baraen um king-omi hani okwudok armatok shenek yowesh inahos um douk nyakrium agundok arpesh shakutukuk Iruhin shanak shenek lotu um madae adurimi god omi um uwe.

okwokwin domaen enen nyeigur nyetem. Baugenyum baraen um enyudok nyeigur douk nyanabeshuk. Enyudok baraen douk nyakri namudok,

“Nyeigur nyuto-umaburi wabur Babilon baugos abom um ihiyumorim armago douk wape wani kupaimi shenek wehrur um wani ihihmorim yoweih abraenyihi aih douk agundok atapishi arpesh shape shenekeh iri.”

⁶ Aria eik yatik okwudok armatok kwape kwabo sabaishi Iruhin ananish arpesh douk shenek bilip dodogowish atish um Jisas aria shakripes ananin baraen kupaishi iri. Okwok kwaesh shagok aria kwogugak abom kabi douk kaw-wok esheshibor sabaibori owishibor aria kwogugak um. Aria douk yatiguk namudok aria eik mishin nyakitak yowiyokuk. ⁷ Aria enyudok ensel nyarige nyakri, “Nyak mishin nyakitak yowiyokuk um maresh? Eik ta ikripen um baugenyum baraen um enyudok nyanabeshuk iri baraen um okwudok armatok kwuni enyudok debeinyi wanarin mahin douk okwok kwatemen kurahenyen iri. Enyen douk 7-poreigos baragos seiren aria 10-poreiruh shuworuuh hakihen iri. ⁸ Enyudok nyatrin iri mahin douk seiwok nyape aria douk madae nyugok. Aria enyen ta nyukutukuk agudok nuwag douk gagor gabuhuk gani atap abom iri nyuto iruhw aria ta nyunak nyuwishuk.

Aria onok buk kwakus. Okwok douk eshudok arpesh douk ta shupe wosik atin ihih nyum-neh iri esheshish nyeiguhw shetemokwi. Aria enesh arpesh douk seiwok Iruhin wata nunek

agundok atap uwe, aria madae nuwem esheshish nyeiguhw okwudok buk iri uwe ta shutik enyudok mahin aria ta shukitak yowiyokuk. Um maresh? Seiwok enyen nyape aria douk uwok, enyen nyagok. Aria anah nyumnah enyen ta wata nyukitak nyupe.

⁹ Aria meinyi arpen douk nyadukemesh abom iri enyen wosik ta nyadukemesh um baugenyum baraen um okwudok armatok kwani enyudok debeinyi mahin. Agusudok 7-poreigos baragos sape enyudok mahin iri douk shakri wobuwobren baraen um 7-poreiruh yodururuh douk okwudok armatok kwatemaruh iri. Aria shopunek, agagos douk shakri wobuwobren baraen um 7-poreim king-omi. ¹⁰ Amam 5-poreim douk hagok, aria anan douk wata nape dodogowini king. Aria anan wata nutogur nupe king uwe. Aria anan ta nutogur aria ta nupe banab meyoh nyutob. ¹¹ Aria enyudok debeinyi mahin douk seiwok nyape aria douk madae enen nyupe iri uwe, enyen douk shakri wobuwobren baraen um anan king douk natogur nape nani amudok anam 7-poreim aria hatogur 8-poreim iri. Aria anan ta wata nunak nuwishuk abom.

¹² Aria aruhudok 10-poreiruh shuworuh nyak nyatruruh iri douk shakri wobuwobren baraen um 10-poreim king-omi douk wata hutogur hupe debeimi iri uwe. Amam ta hurao debeinyi big um hupe king-omi huni enyudok mahin. Aria eshesh ta shupe debeishi banab nyutob, atin aua meyoh. ¹³ Aria amudok 10-poreim king ihm-morim hasuhw atin baraen. Amam hakri hupe dodogowim aria huken amamin debeinyi big nyuni dodog

enyudok debeinyi mahin um ihishmorim arpesh shumnek enyenyin baraen shugipeshen. ¹⁴ Aria amam king-omi huni enyudok mahin ta shuni Nugaen Sipsip nyuni enyenyish armam armago shurpak. Aria Nugaen Sipsip nyuni enyenyishi douk enyen nyagraehesh aria nyahwaresh sha-suhw enyenyin baraen sheyotu dodogowish atish iri ta shubo amudok king huni enyudok mahin shihiyahesh. Um maresh? Enyudok Nugaen Sipsip douk Debeinyi abom um ihm-morim debeimi aria nyape king abom um ihm-morim king. ¹⁵ Aria enyudok ensel wata shopunek nyakripe nyakri, “Abusdok worubus nyák nyatik okwudok yoweikwi armatok kwapenyabus iri douk shakri wobuwobren baraen um sabaishi arpesh. Eshudok arpesh douk shape sabaigosi nahobigos iri. Eshesh douk sisigiruh yegeshiweruh aria sheneyagwreh sabainyi kupainyi baraen iri. ¹⁶ Aria aruhudok 10-poreiruh shuworuh nyak nyatruruh iri huni enyudok debeinyi mahin ta juwehosin um okwudok yoweikwi armatok. Aria eshesh ta shok kwugok aria shutruk shuwaruk owokwihi rupeh aria okwok ta kwugor kwupe aria kwukus. Aria eshesh ta shupe shutah eibug-ikwum shugwoh aria okwok ta shukuhur shuk-weh nyih aria hunuk hiyatokuk. ¹⁷ Um maresh? Eshesh douk Iruhin neshuhur um shugipes ananim atum urkum. Namudok aria anan nakri wosik um amam husuhw atin baraen aria enyudok amamin dodog douk amam haraen um hupe king iri um ta wata huko enyudok mahin. Aria enyen ta nyupe dodogowini king arigaha abudok nyutob Iruhin ananin baraen nyutogur adurin

abom obi nyutob butogur. ¹⁸ Aria okwudok armatok nyak nyatruk iri douk shakri wobuwobren baraen um abrudok debeiburi wabur. Ababur douk bape kabi anan debeini nyeigur nyato iruhuman iri arman douk nape debeini um ihmormirim king hape agundok atap iri um.

18

Debeiburi Wabur Babilon Bananukuk Jurug

¹ Douk enyudok nyanakuk aria eik yatigu kupaingyi ensel nyakutukuk iruhw heven nyabuhi. Enyen douk nyaraao debeinyi big aria enyenyih rupeh hatrugun abom aria ihigunum agundok atap gor nakusuk. ² Aria enyen nyahwar debeg nyakri,

“Abrudok wabur Babilon nyeigur nyato iruhw
aburi douk

bananukuk jurug! Ababur bananukuk!

Aria douk ababur batogur yoweiburi wabur um
eshudok ihishmorim sagabehos shuni warehos
shuni ogwuhudok

yoweiguhwi hwanabosusih abom iri armiguhw
hwupeum.

³ Um maresh? Sabaishi arpesh shape ihigos-
morim nahobigos iri shawok okwokwibar
wainibar abar.

Abrudok abar douk shakri wobuwobren baraen
um

okwokwih yoweihai aih um shani okwok shenek
wehrur um.

Eshesh douk shatik arpesh shape Babilon iri
esheshih yoweihai aih aria shagipeshesh
shenekeh.

Aria amudok ihm-morim king hape agundok
 atap iri
 hani abrudok waburishi arpesh shenek wehrur
 um.
 Aria eshudok douk shenek bisnis agundok atap
 iri
 sharao debeibori utabor um ehudok yoweihai aih
 douk
 eshudok shape abrudok wabur iri shape
 shenekeh iri.”

⁴ Aria eik yemnek kupaihi mah gani iruhw
 heven. Aria enyudok nyeyagwrehi iri nyakri,
 “Ipak eikishi arpesh, ipak pukutukuk abrudok
 wabur
 aria putogrukuk um mare puni
 abrudok waburishi arpesh punek eshudok
 yoweishi inahos eshesh shape shenekesh
 iri.
 Ipak pukutubur-ukuk um ipak mare pumnek
 debeiri eriger douk ta eshesh shumnekar
 iri.

⁵ Um maresh? Eneshenesh yoweishi inahos
 eshesh shape shenekesh iri douk
 sabaishi abom shape kabi waripak kwagit
 nyubuhas kwoshem um.

Aria eshesh shakus shato gani iruhw heven
 aria Iruhin natrish aria anan urkum moromesh.

⁶ Ipak padukemesh eshudok eneshenesh
 yoweishi inahos
 okwok kwape kwenekesh iri douk sabaishi abom.
 Douk namudok aria ipak ta pushanom-umok
 wosik atin
 okwokwish yoweishi inahos aria peshopokesh
 shutoumok.

Okwok kwabadig nubutibari abar bor kap aria
ipak pabarah.

Douk namudok aria ipak wata pubodig
nubutibari abar
namudok atin aria pukok kwubarah um
kwumnek arudokmori atin debeiri eriger
okwok kwenek ipak pemnekar iri.

Aria pushopokor rutoumok shopunek.

⁷ Okwok douk kwatuk okwokwin nyeigur nyato
iruhw
aria kwenek eneshenesh yoweishi inahos douk
okwok mishin nyakitak um kwunekesh iri.

Aria okwok nyeigur nyato iruhw kworao de-
beinyi amaen wosikumok um eshudok
yoweishi inahos douk

riguk okwok kwape kwenekesh iri.

Aria okwok numun nanagunukuk aria kwakri,
'Eik yape debeikwi kwin!'

Eik kabi douk raminen madae nugokuk uwe um.

Aria eik ta mare enen amaen nyutogrume aria
nyuneke ireh.

Adur atin ta uwok!'

⁸ Douk namudok aria atuh nyumnah meyoh
sabaishi yoweishi abom eshudok ta shutogurum
abrudok wabur. Eshudok yoweishi inahos
douk eshudok.

Eneheneh yoweihi arugeh ta hutogrumesh aria ta
shureh debeg.

Aria debeirubi nyurub ta besh aria nyih shop-
unek ta hunish.

Um mares? Debeini Iruhin apa nene
skelumesh

aria nawanamesh eneshenesh yoweishi inahos
eshesh shenekesh iri douk dodogowini abom.

9 “Aria amudok king hape agundok atap iri hani okwudok armatok shenek wehrur um aria shenek sabaishi eneshenesh yoweishi shopunek. Aria amam ta hutiku nyih hunuk aria nyugus supe sukih aria amam ta hurepok yowiyokuk.

10 Amam ta hunogugur abom um arudok debeiri eriger douk okwok kwemnekor iri aria ta hiyotu rougun aria hupe hukri,

‘O giha-mobur abrudok nyeigur nyato iruhw maburi wabur Babilon!

Giha-umep ipak arpesh pape abrudok dodogowiburi wabur iri! Douk banab nyutob, atin aua meyoh

aria ipak pemnek debeiri eriger jurug um eneshenesh yoweishi inahos ipak pape penekesh iri!’”

11 “Aria eshudok arpesh douk shape shenek bisnis agundok atap iri ta urkwip purum abrudok wabur aria esheshiruh aparuh ta yoweruh aria shupe shureh. Um maresh? Ta mare wata enesh kupaishi arpesh shutor anah esheshih jah, uwok.

12 Ta mare enesh arpesh shutor ahudokmori jah. Gol iri siliwa, shuni yopubori utabor, buni yopubi abom weiyoub douk shatarub debeibori utabor iri. Shuni yopihi abom shigorihwihi rupeh huni eneh biyag yomogih owishiborihi rupeh, huni eneh yopihi abom wogeruhiji rupeh. Huni ihigosmorim rowos douk seisik yopuri unar wosik iri, suni ihisimorim eshudok douk shenekesh enen mahin douk shahwaren um elefan iri enyenyiruh naruh iri. Shuni eshudok douk shenekesh agusudok rowos douk shatoragos debeibori utabor iri, shuni eshudok douk shenekesh enen akitohinyi kapa nyeigurinum bras iri. Shuni

eshudok douk shenekesh ainab iri, shuni eshudok yopishi abom douk shenekesh anabor yopubori utabor iri. ¹³ Eshudok shuni ahudokmori jah shopunek. Enyudok shanyoh iri rowog sinamon, nyuni enesh eshudok kabi douk yabro um, shuni enesh eshudok douk shesheh sheisik wosik iri. Shuni enyudok yopinyi sanda douk shahwaren um mer iri, shuni anas gris douk shahwaras um frankinsens iri. Eshudok shuni wain iri arudok sharah iri wel, shuni sabainyi abom plaua, shuni wit douk kabi douk rais um. Shuni bulmakauhos iri sipsip iri hwosahos shuni wilkarahos, shuni arpesh douk wata shape sharahaen iri. Eshudok douk shape shakamum kupaishi shenekumesh mour meyoh iri. Eshudok ihishmorim shuni arpesh* ta mare wata shutorish atin, uwok.

¹⁴ “Aria eshudok douk shenek bisnis iri ta shukripok namudok shukri, ‘Eshudok enesh-enesh ihishmorim douk nyak mishin nyakitakumesh um nyuraesh iri douk shanak shawishuk. Aria nyakish yopishi eshudok douk shatorish debeibori utabor iri shani eneshenesh yopishi eshudok douk shatrugun abom iri shopunek douk shanak shawishuk. Aria nyak ta mare wata nyutrish atin!’ ¹⁵ Aria eshudok douk shenek bisnis um shonakam um eneshenesh eshudok aria shatorish sabaibori utabor eshudok arpesh shape abrudok wabur Babilon iri ta shunogugur abom um arudok debeiri eriger douk ta abrudok waburishi arpesh shumnekar iri. Aria eshesh ta

* **18:13:** Enesh arpesh shape shakamum kupaishi shenekumesh mour meyoh iri. Kupaishi arpesh apa shatorish utabor kabi douk apak mator enesh eshudok shakus stuahas iri um.

shunak shiyotuwi rougun aria ta shupe shure-pobur. ¹⁶ Aria ta shukri,
 ‘O giha mobur atubur abrudok nyeigur
 nyato iruhw mobur iri wabur!
 Seiwok ababur bananek yopihi abom shigorih-wihi rupeh hani sabaihi owishiborihi ru-peh shopunek.

Aria banaginohw gol rani yopubori abom utabor bani weiyoub douk shatorish debeibori utabor iri!

Eshudok eshesh douk shatrugun abom iri.

¹⁷ Aria wata shopunek banab meyoh nyutob, atin aua meyoh

aria ihishmorim eneshenesh eshudok douk shatorish debeibori utabor iri wata shanak shaw-ishuk.’”

“Aria sabaimi hasuhw bodaeg kroruhiyor douk wahur youg iri hani sabaishi pasindia douk shator kroruhiyor aria sharahaen shanak kupairubi warub iri, hani amudok henek mour kroruhiyor iri, shani ihishmorim arpesh douk apa shenek esheshin mour youg iri eshesh ihishmorim ta shiyotuwi rougun um abrudok wabur Babilon.

¹⁸ Aria abudok nyutob ta shiyotu shutik wabur nyih hunubur aria nyugwus sukitak suto obi nyutob, eshesh ta shukri, ‘Douk madae anabur wabur bape agundok atap iri bupe kabi abrudok nyeigur nyato iruhw aburi wabur um uwe, uwok meyoh!’

¹⁹ Aria eshesh ta shuhur nyupruk† shunuwatom baragos aria ta shupe shureh debeg shukri,

† ^{18:19:} Enyudok baraan um shunuwatom nyupruk barag um douk sheneken um shakri shiyabigesum um esheshiruh aparuh yoweruh abom um agundok abrudok wabur bananukuk um.

'O giha-mobur atubur abrudok wabur!
 Eshudok ihishmorim arpesh douk shogrem
 kroruhiyor iri
 sharao sabaibori utabor abrudok wabur.
 Ipak pakri giha mobur abrudok wabur. Um
 maresh?
 Douk banab nyutob, atin aua meyoh abrudok
 waburish
 ihishmorim eneshenesh yopishi eshudok shanak
 shawishuk!
20 Aria ipak enselahos pape iruhw heven iri
 puni ipak Iruhin ananish arpesh,
 puni ipak aposel douk Iruhin nagraehep um
 punak pukripesh ananin baraen iri,
 puni ipak profet douk pakripesh
 Iruhin nakripep-enyi baraen iri,
 ipak ihishmorim ta punadudareh.
 Um maresh? Iruhin nenek kwotimabur
 aria nawanamobur yoweishi inahos abrudok
 wabur
 aria bemnek debeiri eriger um agundok
 seiwok ababur barik benek ipak pemnek debeiri
 eriger um.' "

21 Douk enyudok baraen nyanak nyatuhuk
 aria eik yatik enen dodogowinyi abom ensel
 nyohur onok debeikwi burbuduk‡ nyawashok
 kwagrukuk youg aria nyakri,
 "Ta shuwashak abrudok debeiburi wabur Ba-
 bilon bugrukuk debeg atin gani atap

‡ **18:21:** Enyudok baraen douk nyakrium okwudok debeikwi burbuduk iri douk nyakrium anam takweimi utom douk eshesh shape shemakwiyesh urubit wit um shaworishat um.

kabi eik yawashok okwudok burbuduk kwa-grukuk um.

Aria arpesh ta mare wata shutrubur atin, uwok.

²² Aria eshudok kabi douk gitahas-umori es-heshih meh

huni eneshenesh douk shabirakesh shenek yop-ugi musik iri,

shuni buwaen iri aruruh esheshih meh

ta mare wata shumnekeh atin abrudok wabur, uwok!

Aria shopunek, eshudok douk shadukemesh um shunek enenyenen mour iri ta mare wata shutrish atin.

Aria amudok utom douk arpesh shape shakwum shaworish urubit wit iri shopunek

ta mare wata shumnekam miyagwreh atin abrudok wabur, uwok.

²³ Aria nyih lamhosih ta mare wata shutrish atin.

Aria eshudok arpesh douk shakri shunaraum iri esheshih meh shopunek ta mare shumnekeh atin.

Aria riguk arpesh shape shenek bisnis abrudok wabur

aria sharao sabaibori utabor

aria shatogur debeishi nyeiguhw abom shato-umeshi.

Aria douk uwok. Aria eshudok arpesh shape abrudok wabur iri

shenek anaruh subagwiruh aria shenek rohw um ihishmorim arpesh douk shape ihigos-morim na-hobigos iri.

²⁴ Aria Iruhin natik um abrudok wabur benek yoweishi inahos

babo amam profet hani sabaishi Iruhin ananish
arpesh shagok.

Douk namudok aria baraen abrudok wabur ba-
nasuwen.

Aria ihishmorim arpesh douk
kupaishi shaesh shagok iri shopunek,
baraen douk nyanak um abrudok atubur wabur
banasuwen.”

19

Iruhin Ananish Arpesh Shanadudareh Um Agundok Babilon Bananukuk Um

¹ Douk enyudok nyanakuk aria yemnek enen
arpen nyeyagwrehi debeihi mah kabi douk
sabaishi arpesh shape sheneyagwreh iruhw
heven iri um nyakri,

“Apak mutuk Iruhin ananin nyeigur nyuto iruhw!
Apakin Iruhin anan atun narap matanamori
mape wosik.

Aria agundok anan dodogowin natrugin abom
um douk
nape abom um anan atun.

² Anan neneken um arpesh iri baraen um
nasuhw esheshig durdurig kwotog um douk
yopug wosik abom aria adurig atug!

Aria okwudok armatok douk kwani kupaimi
shenek wehrur um
kwenek sabaishi arpesh shape agundok atap iri
shakutukuk yopihi aih aria shagipesh okwokwih
yoweihai aih.

Douk namudok aria Iruhin neneke kwotumok
nakri okwok yoweikwi.

Aria shopunek, okwok kwabo eshudok arpesh
 douk
 shenek ananin mour iri shagok aria douk
 anan douk nawanamok enyudok yoweinyi poe.
 Okwudok armatok douk shakri wobuwobren
 baraan um
 abrudok wabur Babilon.”

³ Aria sabaishi shape iruhw heven iri shape
 shahwar debeg shakri,
 “Apak mutuk Iruhin ananin nyeigur nyuto iruhw!
 Aria ogwusudok nyugwus douk sakih ehudok
 nyih douk hanu
 abrudok debeiburi wabur iri ta sukih suto ihih
 nyumneh!”

⁴ Aria amudok 24-poreim debeimi armam hani
 eshudok nubatish dodogowishi douk mishish
 shoresh iri shabuh shoduk ohrubus aria shenek
 lotu um Iruhin douk nape ananin debeinyi wagitur
 iri aria shahwar shakri,
 “Adur atin, apak mutuk Iruhin ananin nyeigur
 nyuto iruhw!”

⁵ Aria eik yemnek anah mah agundok enyudok
 debeinyi wagitur nyakus um. Aria enyudok
 arpen nyeyagwrehi iri nyakri,
 “Ipak ihishmorim penek Iruhin ananin mour iri
 puni

ipak nyeiguhw shatoumep iri,*
 puni nyeiguhw wokepari douk punogugur um
 Iruhin penek lotuman
 aria pusuhw ananin baraan pugipeshen iri
 putuk ananin nyeigur nyuto iruhw!”

* **19:5:** Putik futnot nyape Revelesen 11:18 iri.

*Nugaen Sipsip Ta Nyurao Enyenyik Irohukwik
Aria Ta Shunek Debeguni Worigun*

⁶ Aria eik yemnek enen arpen nyeyagwrehi debeihi mah kabi douk sabaishi arpesh shape sheyagwrehi um. Ahah douk kabi worub batogur beyagwreh um aria kabi utag pogarog debeg um. Aria eik yemnek hakri,

“Apak mutuk Iruhin ananin nyeigur nyuto iruhw!
Apakin Debeini douk anan atun Dodogowini
Iruhin abom.

Anan douk nape debeini um ihishmorim arpesh
shani
eneshenesh eshudok!

⁷ Anan douk dodogowini arman abom.

Aria douk apak ta aparuh yopuruuh
aria munadudareh-uman aria mutuk ananin
nyeigur nyuto iruhw!

Nyumnah douk hanaki um Nugaen Sipsip nyurao
enyenyik irohukwik.[†]

Baugenyum baraen um Nugaen Sipsip enyenyik
irohukwik douk nyakrium Krais ananish
arpesh.’

Okwok douk kwenek garibog kwape um eshesh
biyesh shunaraum um.

⁸ Okwok douk shokok anah yopihi hatrugun
abom iri
shigorihwihi rupah kwohur.”

Ehudok rupeh iih douk shakri wobuwobren
baraen um ehudok yopihi abom aih douk Iruhin
ananish arpesh shape shenekeh iri. ⁹ Aria enyudok
ensel nyakripe nyakri, “Nyak wem enyudok
baraen. Baraen enyudok.

[†] **19:7:** Putik futnot nyape Revelesen 11:18 iri.

'Eshudok arpesan douk Iruhin nahwaresh um shunaki um agundok debeguni worigun douk shenekagun um
Nugaen Sipsip nyurao okwok iri um,
douk eshesh wosik shanadudareh.' "

Aria enyudok ensel wata shopunek nyakripe nyakri, "Enyudok Iruhin ananin baraen douk adurin abom atin."

¹⁰ Aria eik yabuh yoduk ohrubus hurukatin um enyenyiruh yeriweruh um yakri inek lotuman.
Aria enyen nyakripe nyakri,
"Nyak mare nyunek lotu um eik, uwok.
Nyak nyunek lotu um Iruhin atun.
Eik yani nyak wani eshesh Kristen,
apak ihishmorim douk munek Iruhin ananin mour iri atup.
Ipak douk pasuhw enyudok baraen Jisas nakripen pagipeshen iri.
Enyen douk enyudok atin baraen nyohur amam profet amamiruh aparuh aria hakripesh Iruhin nakripam-nyi baraen."

Arman Netem Shigorihwinyi Hos Iri Anan Douk Krais

¹¹ Aria ogwudok orug douk gweshiguk iruhw heven iri tukarog gwanak gweyatuk tukwotuk-wan aria eik yatigu enen shigorihwinyi hos nyeyotu numun heven. Aria anudok arman netem enyudok hos iri douk nanahwar namudok. Anan neyotu dodogowin atun nagipesan ananin baraen wosik aria neyagwreh adurin atinyi baraen iri. Aria douk anan nasuhw arpeshig kwotog nenekog wosik atin. Aria anan

nenek wanohw um, anan apa nagipesh ananih yopihi abom aih atin. ¹² Ananis nabes sape kabi nyih hanu jurareh iri um. Aria anan nowem um sabaigwi yopugwi hatog douk king-omi atum hogwem iri um ananig barag. Aria shopunek, enen nyeigur nyetem ananihw yegenyihw. Ku-paishi mare shudukem um baugenylum baraen um enyudok nyeigur uwe, uwok. Anan atun nadukemen. ¹³ Aria ahudok rouhi rupah anan nohur iri douk shosegruh owishibor aria owishibor atubor bakrupoh. Aria eshesh shahwaran enyudok nyeigur shakri, "Iruhin Ananin Baraen." ¹⁴ Aria eshudok ami douk shape iruhw heven iri shenek yopihi abom shigorihwihi rupeh aria shetem esheshish shigorihwishi hwosahos aria shape shagipeshan. ¹⁵ Aria anat wanohwit bainat tatograri anudok arman ananit nokwat. Aria anan ta nukwu atudok bainat um nubo sabaishi arpesh douk shape sabaigosi nahobigos iri. Aria anan ta nusuhw anam butum douk shenekam ain iri aria nupe debeini um ihishmorim arpesh. Aria anan ta nushish wainip shurkwip agudok de-beigari tenk douk shenekag utabor iri. Enyudok douk shakri wobuwobren baraen um agundok Dodogowini abom Iruhin nabo ihishmorim eshudok shabuhuk iri juwehosin abom um. ¹⁶ Aria enen baraen nyetem anudok arman ananin mib nyani ananih rupah. Enyudok baraen douk nyakri namudok,

"Debeini um ihm-morim king aria shopunek
Debeini um ihm-morim debeimi."

¹⁷ Aria eik yatigu enen ensel nyeyotuwi nyum-nahin aun aria nyahwarugu debeg ogwuhu-

dok ihiguhw-umorim armiguhw douk hwanadudareh hwanak iruhw iri nyakri, “Ipak ihiguhw-morim punakumori Iruhin nenekegun iri debe-guni worigun! ¹⁸ Ipak punaki puwok amudok king-omi huni amudok douk hape debeimi um amam soldia iri huni amudok dodogowimi ar-mam amamiruh yegeshiweruh. Aria shopunek, puwok hwosahos shuni amudok douk hetem hwosahos iri, huni ihishmorim arpesh. Eshudok douk shape shakamum kupaishi shenekumesh mour meyoh iri, shuni eshudok douk shape wosik iri, shuni ihishmorim nyeiguhw shato-umesh iri,[‡] shuni nyeiguhw wokeshi esheshiruh yegeshiweruh!”

¹⁹ Aria eik yatik um enyudok debeinyi mahin nyani amudok agundok atapim king hani es-heshim soldia shanak sheyotu atugun. Es-hesh shanak sheyotu um shuni anudok arman douk netem enyudok hos iri nini ananim soldia shurpak. ²⁰ Aria eshesh shasuhw enyudok debeinyi mahin nyani anudok nenek rohwumesh iri profet showeshikesh. Anudok profet douk nenek enenyenen Iruhin atun neneken iri mour agundok enyudok mahin nyape um. Riguk anudok profet douk nenek sabainyi mour kabi Iruhin atun neneken iri um aria nenek rohw um eshudok arpesh douk sharao enyudok mahin enyenyin kak aria shenek lotu um enyenyir aborir iri. Aria enyudok mahin nyani anudok profet eshesh mishish wata shoresh aria showashesh shagrukuk agudok nuwag douk nyih

[‡] **19:18:** Putik futnot nyape Revelesen 11:18 iri.

hanuwi amudok utom douk shahwaram salfa iri hanu um. ²¹ Aria anudok arman douk netem hos iri nabo enyudok mahin nyani anudok profet esheshim soldia hagok hatuh. Anan makwumam atudok bainat douk tatograri ananit nokwat iri. Douk amam hagok aria ihiguhw-umorim armiguhw hwanaki hwape hwawok amamiruh yegehiweruh aria ogwoguh dugaroguh abom wosik atin.

20

Satan Nanaweshik Nape Sabaishi Um 1,000-poreish Kwarahos

¹ Aria wata shopunek yatigu kupainyi ensel nyakutukuk iruhw heven nyabuhi. Enyen nyasuhwi anan debeini sen nani ki um agudok nuwag douk gagor gabuhuk gani atap aria at-apig um madae gubuh giyotu anabik iri uwe. ² Aria enyudok ensel nyasuwor dodog arudok debeiri yur aria nyoweshikor anudok sen um nyuweshikor rupe um 1,000-poreish kwarahos. Arudok yur douk shahwaror um seiwokiri yur iri. Aria shopunek, arar douk shahwaror um renek rohw um arpesh rakri eshesh shenek yoweishi inahos atish iri o Satan. ³ Aria enyudok ensel nyawashak arudok debeiri yur Satan rabuhukuk agudok nuwag douk gagor gabuhuk gani atap iri aria nyawarukuk wit dodog. Enyen nyawarukuk wit um arudok yur mare wata runak runek rohw um arpesh douk shape ihigos-morim nahobigos iri. Arar ta rupe arigaha 1,000-poreish kwarahos shunak shudiguk aria ensel ta wata nyijkumar

wit aria arar ta wata rutogur rupe meyoh rupe runarahaen banab meyoh nyutob.

⁴ Aria eik yatigu enesh debeishi wagitura-hos douk king-omi atum hapenyesh iri shakus. Aria enesh arpesh shatem eshudok wagiturahos. Eshesh douk Iruhin nekesh debeinyi big um shusuhw arpesh esheshig kwotog. Aria shop-unek, yatik sabaishi arpesh douk shasuhw Iruhin ananin baraen dodog shagipeshen iri esheshish mishish. Eshesh douk eshudok shakripesha-rena kupaishi um Jisas, aria horim shatupok esheshigos baragos aria shaesh shagok iri. Eshesh douk madae shurao enyudok debeinyi mahin enyenyin kak nyupe esheshish domaesh aria esheshish roguhw aria shunek lotu um enyen nyuni enyenyir aborir iri uwe. Eshesh wata mishish shawishesh aria shakitaki shani Krais shape debeishi um eshudok 1,000-poreish kwarahos. ⁵ Aria abudok nyutob eshesh shakitaki um, ahah douk sagomih nyumnah abom um shagok iri shakitaki wonugwegwiruh um. Ihish-morim shagok iri arpesh yapis madae suwishesh abudok nyutob uwe, watak. Eshesh ta eshudok 1,000-poreish kwarahos shunak shudiguk aria eshesh ta kadak yapis suwishesh aria shukitaki. ⁶ Aria eshudok arpesh douk shukitaki wonugwegwiruh ahudok sagomih nyumnah iri, eshesh ta shunadudareh aria shupe Iruhin ananish yopishi abom arpesh. Aria Iruhin nunek yopishi abom um eshesh. Aria agundok um shugiguk shugok um ta mare dodogowigun um nesh shugok anah shopunek, uwok. Eshesh ta shupe kabi pris douk hape henek ofa um eneshenesh eshudok

hako Iruhin nani Krais iri um. Aria eshesh ta shuni Krais shupe debeishi shusuhw merik um sabaishi arpesh um eshudok sabaishi 1,000-poreish kwarahos.

Satan Nemnek Debeiri Abom Eriger

⁷ Douk eshudok 1,000-poreish kwarahos shunak shudiguk aria Satan ta wata jurug um shunuweshik um aria ta shijkuman wit agudok nuwag aria nutograri aduk. ⁸ Anan ta nutograri um nunak nupe nunek rohw um sabaishi arpesh douk shape ihigosmorim nahobigos douk sape ihigunum agundok atap iri. Eshesh douk shape Gok nani Magok iri. Aria Satan ta nuraesh shunak shupe atugun um shupe shurpak. Eshesh douk sabaishi abom kabi douk sabaiti arukot douk takus anagas um youg iri um. ⁹ Eshesh shanak ihigunum agundok atap aria sheyotu shersharih Iruhin ananish arpesh shapeum. Eshesh douk shape abrudok wabur douk Iruhin urkum manawasham-abur abom iri. Aria nyih hagruki iruhw heven aria habuhi hanu eshudok Satan ananish soldia heyatesh. ¹⁰ Aria eshesh shawashak Satan douk nape nenek rohwumesh iri nagrukuk kupaigi debeigi nuwag douk juwe-hosihi nyih hanuwi amudok utom douk shah-waram um salfa iri hape hanumi um. Enyudok debeinyi mahin nyani anudok nenek rohwumesh iri profet douk sharik showashesh shabuh shor agudok nuwag. Aria agundok eshesh bishatin ta shupe shunomnek debeiri eriger nyumneh weibus ihih nyumneh.

Debeiti Kwot Tatogur

11 Aria eik yatigu enen debeinyi shigori-hwinyi wagitur king-omi atum hapenyen iri nyakus. Aria anan debeini netem enyudok wagitur. Aria agundok atap nani iruhw heven sharuwokuk shanak shawishuk. **12** Aria eik yatik eshudok ihishmorim shagok iri. Eshudok douk nyeiguhw shato-umesh iri* shani nyeiguhw wokeshi sheyotu hurukatin um enyudok debeinyi wagitur nyakus um. Aria ono bumeb wanajik. Aria okwudok onok buk douk eshudok arpesh douk ta shupe wosik ihih nyumneh iri esheshish nyeiguhw shatemokwi shopunek kwanajik. Aria anudok netem enyudok debeinyi wagitur iri natik eneheneh aih hatem oudok bumeb iri douk eshudok arpesh shape shenekeh iri. Aria anan nenekumesh baraen wosik-umesh um ihishmorim eneheneh aih douk eshesh shape shenekeh iri. **13** Aria ihishmorim shagok iri douk seiwok shagok youg aria esheshiruh yegeshi-weruh horukuk youg iri wata shakutukuk youg shakitak shatowi. Aria ihishmorim shagok iri douk shagok shanak shape agundok shagok iri shanak shapeum iri wata shakitak shatowi. Eshesh shakitaki shape aria anudok netem wagitur iri nenekumesh baraen ihishmorim atin atin wosik-umesh abom um eneheneh aih iri mour eshesh shape sheneken iri. **14** Aria gok nyani agundok shagok iri shapeum nanawashak na-grukuk agudok nuwag douk nyih hape hanug iri. Agudok nuwag agag atug douk shakri nyagiguk iri gok ta arpesh shubuh aria mare shugok anah shopunek um. **15** Aria ta enesh arpesh esheshish

* **20:12:** Putik futnot nyape Revelesen 11:18 iri.

nyeiguhw madae shutem okwudok buk douk eshudok arpesh douk ta shupe iih nyumneh iri esheshish nyeiguhw shetemok iri um, eshesh ta shunawashak shugrukuk agudok nuwag douk nyih hanug iri.

21

Namuburi Wabur Heven Aria Namubi Amnab

¹ Douk enyudok nyanakuk aria eik yatigu namuburi wabur heven bani namubi amnab shape. Barik iri wabur heven bani barik iri amnab shani youg shanak shawishuk abom aria madae enesh shupe uwe. ² Aria eik yatigu abrudok yopuburi wabur Jerusalem. Ababur douk bape iri agundok Iruhin napecum aria bakutukuk iruhw heven bape babuhi. Abrudok wabur douk shaginohwobur kabi douk onok armatok douk kwanaginohw kwenek yopihi atih rupeh aria kwape um kwuni okwokwin raminen shunaraum iri. ³ Aria eik yemnek anah mah agundok enyudok debeini wagitur nyakus um. Aria enyudok arpen nyeyagwrehi iri nyakri debeg, “Ipak pumnek! Douk Iruhin nani arpesh shape atugun! Aria anan ta nini eshesh shupe aria eshesh ta shupe ananish atish arpesh. Aria anan ta nupe esheshin debeini Iruhin. ⁴ Aria anan ta nubatikumesh abih esheshis nabes aria eshesh ta mare wata shugok atin, uwok. Aria esheshiruh aparuh ta mare wata yoweruh aria shumnek anar eriger aria shureh, uwok. Ihinyumorim enenyenen douk seiwok nyape nyatogur um arpesh iri douk nyanak nyawishuk abom.”

⁵ Aria anudok nape enyudok debeinyi wagitur iri nakri, “Ipak pumnek! Douk eik yenek ihishmorim eneshenesh eshudok shape iruhw atap iri shatogur namushi!” Aria anan wata shopunek nakripe nakri, “Nyak nyuwem um enyudok baraen douk iganigadae nyemneken iri anap shup. Um maresh? Enyudok baraen douk adurin abom aria wosik um arpesh shumneken aria shusuhwen dodog shugipeshen.” ⁶ Aria anan nakripe shopunek nakri, “Eshudok eneshenesh douk shatogur shatuh! Seiwok baugos um ihishmorim eneshenesh eshudok watak enesh shutogur shupe uwe aria eik yape. Aria kweipon shopunek ta ipe arigaha hugiguk iri nyumnah hutogur. Aria meinyi arpen abar baen iri, eik ta iken anabar abar nyubroh meyoh. Enyen mare nyutorabar, uwok. Abrudok abar douk bakih atap meyoh iri. Ababar douk ta arpesh shubroh aria shupe wosik abom ihih nyumneh iri. ⁷ Aria meinyi arpen douk nyiyotu dodogowin atin nyunek wanohw nyubo yoweishi inahos shubuhuk iri, enyen ta nyugrem ihishmorim eikish yopishi eshudok eneshenesh. Aria eik ta ipe enyen nyenek lotume iri Iruhin, aria enyen ta nyupe eikin batowin. ⁸ Aria eshudok douk shanogugur aria wata shatanam shenek yoweishi inahos iri, shuni eshudok douk madae shusuhw eikin baraen dodog shugipeshen iri uwe, shuni eshudok douk shenek eneshenesh yoweishi inahos iri, shuni eshudok douk shabo kupaishi arpesh shagok iri, shuni eshudok douk shenek wehrur um iri, shuni eshudok douk shenek ouruh iri, shuni eshudok douk shenek

enenyen'en um yoweiruhi subagwiruhi iri, shuni eshudok douk shenek lotu um eshudok douk madae adurimi god omi iri uwe, shuni eshudok douk shenek rohwumesh iri, eshesh ihishmorim ta shunak shupe agudok nuwag douk juwehosih nyih hape hanu agari. Agudok nuwag agag douk ta arpesh shubuh aria mare shugok anah shopunek um."

Namuburi Wabur Jerusalem

⁹ Aria enen ensel um eshudok 7-poreish ense-lahos douk shasuhw shagiguk abom iri 7-poreish yoweishi abom eshudok eneshenesh iri nyanaki aria nyakripe nyakri, "Nyak yowi aria iyabigen nugaen Sipsip enyenyik irohukwik." ¹⁰ Aria Iruhin ananin Mishin nyatogrume dodogowin atin aria agundok eik kabi douk yabo yomnis um. Aria enyudok ensel nyare wanak wato onohw debeihwi rouhwu yoduhw. Aria enyen nyeyabige abrudok Iruhin ananibur yopuburi wabur Jerusalem. Ababur douk baperi agundok Iruhin napecum aria bakutukuk iruhw heven bape babuhi. ¹¹ Aria agundok douk Iruhin dodogowin abom aria natrugun abom um natrugun numun abrudok wabur. Aria ababur babuhi anabik sik kabi douk anam yopumi utom douk shatorum debeibori utabor iri mabuhi um. Aria shopunek, ababur babuhi kabi douk anam utom jaspa mani wenyir shabuhi um. ¹² Aria arbudok narub douk sharukarubi narub um abrudok debeiburi wabur iri douk debeirubi abom aria rourourubi bato gani iruhw. Aria 12-poreish duahas shape arbudok narub. Aria shopunek, 12-poreish enselahos sheyotu sheyoh um eshudok

12-poreish duahas. Aria asudok 12-poreis awirosish arpesh douk shakitaki Israel iri esheshish nyeiguhw shetem eshudok 12-poreish duahas. ¹³ Aria bishatin duahas shape gani wobrehahirub um narub douk bape batik aun nakihumori um. Aria bishatin shape shatik saut, bishatin shape shatik not, aria bishatin shape shatik aun nabuh um. ¹⁴ Abrudok debeiburi waburirub narub agundok atapirub um douk betem um 12-poreibor utabor um busuwobur batao dodog iri. Aria enyudok Nugaen Sipsip enyenyim 12-poreim aposel douk riguk enyen nyograeham um hunak hukripesh Iruhin ananin baraen iri amamish nyeiguhw shatem abrudok 12-poreibor utabor.

¹⁵ Aria enyudok ensel douk nyani eik weyagwreh iri nyasuhw anam butum douk shenekam gol iri um shape shasuhw wigah um eshudok eneshenesh-am iri. Enyen nyakri nyusuhw wigah um abrudok debeiburi wabur buni arbudok debeirubi narub buni eshudok duahas douk shape narub iri. ¹⁶ Abrudok debeiburi wabur roubur um bani agundok debebur um douk arag atin abom. Aria enyudok ensel nyakwu enyenyim butum aria nyasuhw wigah um abrudok wabur. Aria douk enyen nyasuhw wigah aria ihiburmorim agundok roubur um bani debebur um bani agundok atap bato iruhw um douk aragum atin abom. Aria shasuhw wigah um, ababur douk rourouburi abom hurukatin um 2,200 kilomita. ¹⁷ Aria enyen nyasuhw wigah um narub shopunek. Aria agundok atap bato iruhw um douk hurukatin um 144 mita. Amudok butum enyen nyasuhw wigah um arbudok narub iri

douk amudokmori um douk arpesh apa shasuhw wigah um eshudok eneshenesh iri um. ¹⁸ Aria arbudok narub douk shenekarub abrudok utabor atubor douk shahwarabor um jaspa iri. Aria wabur ababur kanak shenekabur shakwu yopuri gol douk rabuhi aria ratrugun kabi wenyirumori. ¹⁹ Atapirub um arbudok narub douk shenekarub um shunek narub um abrudok wabur iri douk shenekarub dodog. Aria shaginohwarub sabai-bori sisigibor yopubori utabor douk shatorabor debeibori utabor iri.

Marik iri utom douk

makus atap um masuhw arbudok narub iri
douk jaspa.

Aria magiguk iri douk bluporeimi douk shah-waram um sapaia iri.

Aria biobor atum iri douk shigorihwimi douk
shahwaram um aget iri,
aria nubatibor iri douk grinporeim douk shah-waram um emeral iri.

²⁰ Aria anas wisi-ibor iri douk anabigim um
owishiborim

aria anabigim um shagarihwim.

Amam douk shahwaram um sadonikis iri.

Aria anas wisi-ibor iri douk owishiborimi douk
shahwaram um konilian iri.

Aria namba 7-im douk akitohimi douk
shahwaram um krisolait iri,
aria namba 8-im douk sikim grinporeim douk
shahwaram um beril iri.

Aria namba 9-im douk anam sikim akitohimi
douk
shahwaram um topas iri,
aria namba 10-im douk anabigim um grinporeim

aria anabigim um akitohimi iri.
 Aria amam douk shahwaram um krisopres iri.
 Aria namba 11-im douk anam sikim blupor-eimi douk
 shahwaram um haiyasin iri,
 aria namba 12-im douk anam sikim owishi-borimi utom
 shahwaram um ametis iri.

²¹ Aria eshudok 12-poreish duahas douk shenekesh shakwu 12-poreib shigorihwibi debeibi weiyoub douk shatarub debeibori utabor iri. Aria eshudok duahas atin atin shenekesh shakwu atut atut um debeigwi weiyoubig natog douk shahwarog um pel iri. Aria ahudok debeihi yah douk hape abrudok debeiburi wabur iri douk shenekah yopiri gol aria ahah hape kabi wenyir* um.

²² Aria eik madae itik Iruhin ananit debeiti urupat tutao abrudok wabur uwe, uwok. Um maresh? Debeini Iruhin anan douk Dodogowin abom nabo ihishmorim eshudok shabuhuk iri nani Nugaen Sipsip amam kanak hape kabi Iruhin ananit urupat um. ²³ Aria abrudok wabur mour ta mare enen um wah hutao hobur um o wabin aun wanyukehin aria nutrugun um, uwok. Um maresh? Agundok douk Iruhin dodogowin aria natrugum abom um, agagun kanak ta nunek ihigunmorim um abrudok wabur butrugun aria bogaragun. Aria shopunek, enyudok Nugaen Sipsip enyen kanak nyabuhi kabi douk lam um aria

* **21:21:** Arudok gol arar douk anar sikir. Arpesh shutrur um, eshesis nabes ta sunak dukwotis sunakuk kabi shape numun urupat shenek narubumat glas iri shatik glas nabes arukwutis shatik aduk um.

nyenekagun bogaragun abrudok wabur. ²⁴ Aria ihishmorim arpesh shape sabaigosi nahobigos iri ta abrudok wabur butrugun-umesh aria eshesh ta shunatrugun aria shurahaen. Aria amam king douk hape agundok atap iri ta hurao amamibor utabor buni ihishmorim eneshenesh amamish yopishi eshudok hunak huwish abrudok wabur um hakri hutuk Iruhin ananin nyeigur nyuto iruhw. ²⁵ Aria nyumneh, abrudok waburish duahas ta shunejik shupe namudok atin. Um maresh? Agundok weibus ta mare anabus, uwok. ²⁶ Aria ihishmorim arpesh shape ihigos-morim nahobigos iri ta shurao esheshibor utabor buni yopihi jah shuwish abrudok wabur um shutuk Iruhin ananin nyeigur nyuto iruhw. ²⁷ Aria ihishmorim eneshenesh shabosusih iri yoweishi eshudok shuni eshudok arpesh douk shenek eneshenesh yoweishi inahos iri, shuni eshudok douk shenek abraenyih aih iri, shuni eshudok douk shenek rohw um kupaishi iri ta mare shuwish abrudok wabur, uwok. Aria eshudok arpesh douk esheshish nyeiguhw shetem Nugaen Sipsip enyenyik buk iri eshesh atish ta shuwish abrudok wabur. Okwudok buk okwok douk eshudok arpesh douk ta shupe wosik abom iih nyumneh iri esheshish nyeiguhw shetemokwi.

22

*Worubibar Abar Bani Shurkwip Peir Rowog Iri
Douk Ta Arpesh Shishoh Aria Shupe Wosik Abom
Iri Ihih Nyumneh*

¹ Aria enyudok ensel wata shopunek nyeyabige anab debeibi worub. Abudok worub shopunek

douk bogarab abom kabi douk wenyir ratrugun um. Aria arpesh shuwok abar abudok worub iri ta shupe wosik abom ihih nyumneh. Abudok worub douk batobe iri agundok enyudok debeinyi wagitur douk Iruhin nani Nugaen Sipsip hatemenyi nyakus um. ² Aria abab bau banak orokohunih um ahudok debeihi yah douk hape abrudok wabur iri. Aria enesh rowos shataao wobuwobur abudok worub. Aria eshudok arpesh douk shuwok shurkwip peir eshudok rowos iri ta shupe wosik abom ihih nyumneh. Aria shurkwip apa peir ihibmorim aub enen kwar. Aria esheshis shus ta sunek ihih-morim eneheneh arugeh henekesh iri arpesh douk shape ihigosmorim nahobigos iri shutogur yopish. ³ Aria ihih-morim eneshenesh yoweishi inahos eshudok shuni arpesh douk Iruhin nakri adur iruhw abom um nakri wokumesh iri ta mare enesh shukus abrudok debeiburi wabur, uwok.

Aria Iruhin nini Nugaen Sipsip amamin debeinyi wagitur ta nyukus abrudok wabur. Aria eshudok douk shenek Iruhin ananin mour iri ta shupe shunek lotuman. ⁴ Eshesh ta shutik ananig yamag aria ananin nyeigur ta nyutem esheshish domaesh. ⁵ Aria agundok weibus ta mare anabus aria eshesh ta mare shuhem enesh lamhos, uwok. Aria mour ta mare enen um wah hutao um hunekagun juwehos-igun um, uwok. Um maresh? Agundok douk Debeini Iruhin natrugun abom um ta nutrugun-umesh. Aria eshudok douk shenek ananin mour iri ta shupe debeimi king-omi ihih nyumneh.

Jisas Hurukatin Um Nunaki

⁶ Aria enyudok ensel nyakripe nyakri, “Enyudok ihinyumorim baraen douk nyak nyenyem okwudok buk iri douk adurin atin abom. Aria enyen douk wosik abom um ihishmorim arpesh shumneken aria shusuhwen dodog shugipeshen. Aria debeini, anan douk Iruhin douk apa no-hur amam profet um hunak hukripesh ananin baraen iri. Anan neshopok ananin ensel nyanaki um nyiyabig ihishmorim shenek ananin mour iri um ihishmorim eshudok eneshenesh douk hurukatin um shutogur iri.”

⁷ Aria Jisas nakri, “Mnek, eik douk hurukatin um inaku itogrume! Aria eshudok arpesh douk shugipesh Iruhin ananin baraen nyetem okwudok Buk iri douk nyakrium eshudok douk ta shutogur iri, eshesh ta shunadudareh.”

⁸ Aria eik Jon, eik kanak yemnek ihinyumorim baraen aria yatik ihishmorim eshudok douk yeshem okwudok Buk iri. Aria douk yemnek enyudok baraen aria shopunek yatik eshudok ihishmorim eneshenesh iyoh aria yabuh yoduk ohrubus hurukatin um enyudok ensel douk iganigadae nyape nyeyabige ihishmorim eshudok iri enyenyiruh yeriweruh aria yakri inek lotuman. ⁹ Aria enyen nyakripe nyakri, “Nyak mare nyunek lotu um eik, uwok! Eik yani nyak wani nyakim ashukenyim amam profet, mani ihishmorim arpesh douk apa shagipesh enyudok baraen douk nyetem okwudok Buk iri, apak ihishmorim douk munek atin mour iri. Douk namudok aria nyak nyunek lotu um Iruhin atun!”

¹⁰ Aria enyen nyakripe nyakri, “Nyak mare nyubeshuk enyudok Iruhin ananin baraen douk nyetem okwudok buk iri, uwok. Um maresh? Abudok nyutob douk Iruhin nakri nunek eshudok douk shetem okwudok buk iri shutogurum douk banaki hurukatin. ¹¹ Douk namudok aria eshudok arpesh douk shenek yoweishi inahos iri ta shupe um shunek yoweishi inahos namudok atin. Aria eshudok douk shenek eneshenesh shanabosusih abom iri yoweishi inahos iri ta shupe um shunek yoweishi inahos namudok atin. Aria eshudok arpesh douk shenek yopihi aih iri ta shupe um shunek yopihi aih namudok atin. Aria eshudok arpesh douk shape Iruhin ananish atish iri ta shupe ananish atish abom.”

¹² Aria Jisas nakri, “Mnek! Eik douk hurukatin um inaku. Aria eik ta iraougu eshudok um iko ihishmorim arpesh atin atin um iwanamesh ihihmorim eneheneh yopihi o yoweishi aih eshesh riguk shape shenekeh iri. ¹³ Douk seiwok baugos um ihishmorim eneshenesh eshudok madae enesh shupe uwe, aria eik yape. Aria kweipon shopunek eik ta ipe arigaha hugik iri nyumnah hutogur.

¹⁴ Aria eshudok arpesh douk apa shanokwrup esheshih rupeh hatogur yopih iri, eshesh wosik ta shunadudareh. Um maresh? Eshesh ta shurao big um shuwok epudok shurkwip douk peir enyudok rowog douk ta shupoh aria shupe wosik abom ihih nyumneh iri. Aria shopunek, eshesh wosik ta shunak shuwish abrudok waburish duahas aria shuwish shupe numun. ¹⁵ Aria eshudok douk shenek yoweishi abraenyih aih iri shuni

eshudok douk shenek ouruh aturuh iri, shuni eshudok douk shenek enenyenen um sabagwiruh iri, shuni eshudok douk apa shenek wehrur um iri, shuni eshudok douk shabo kupaishi shagok iri, shuni eshudok douk shenek lotu um madae adurimi god omi iri uwe, shuni ihishmorim arpesh douk esheship urkwip panawasham um ehudok aih um shunek rohw um kupaishi arpesh um aria shagipesheh shenekeh iri, eshesh ta mare shuwish abrudok wabur, uwok. Eshesh ta shupeik aduk.

¹⁶ Aria douk eik Jisas yeshopoku enyudok eikin ensel nyanakumogu ipak aria nyakripep um enyudok enenyenen douk nyetem okwudok buk iri um ipak Iruhin ananish arpesh. Eik douk Devit ananin barhonin douk yikitaki ananip awirop iri. Aria eik douk okwudok unuk douk kwanah-war um shuduwi kwaterugun abom iri.”

¹⁷ Aria Iruhin ananin Mishin nyani Nugaen Sipsip enyenyik irohukwik* shakri, “Yowi!” Aria eshudok arpesh douk shumnek enyudok baraen iri shopunek ta shukri, “Yowi!” Aria eshudok arpesh douk abar baesh iri ta shunaki aria shuwok abrudok abar douk ta arpesh shubroh aria shupe wosik abom ihih nyumneh iri. Ababar Iruhin ta nukeshabar meyoh. Eshesh ta mare shutorabar, uwok.

Nyagiguk Iri Baraen

¹⁸ Aria eik Jon yakri ikripesh enyudok dodogowinyi baraen ihishmorim arpesh douk

* **22:17:** Enyudok baraen um Nugaen Sipsip enyenyik irohukwik douk nyakri wobuwobren baraen um Iruhin ananish arpesh.

shemnek Iruhin ananin baraen douk nyetem okwudok buk iri. Enyudok baraen douk nyakrium eneshenesh eshudok douk ta shutogur iri. Baraen enyudok. Ta enen arpen nyuwem enen kupainyi baraen shopunek um enyudok baraen douk eik yenjem nyetem okwudok buk iri um, Iruhin ta nunek yoweishi abom eshudok shutogrumen namudok. Eneshenesh yoweishi eshudok douk okwudok buk kwakriyesh iri ta shunek arpesh shumnek debeiri eriger iri, Iruhin ta wata nenekeh um enyudok arpen enyenin yoweinyi poe aria ta shutogurum enyen atin. ¹⁹ Aria shopunek, ta enen arpen nyukri nyukutukuk enen Iruhin ananin baraen douk eik yenjem nyetem okwudok buk iri um, Iruhin ta mare nukri wosik um enyen nyunak nyuwish nyunadi anep shuruwep douk peir enyudok rowog douk ta arpesh shupoh aria shupe wosik abom iih nyumneh iri, uwok. Aria enyen ta mare nyuwish nyupe abrudok ananibur yopuburi wabur douk baraen nyetem okwudok buk iri nyakriabur iri.

²⁰ Aria anudok arman douk nakripap um ihish-morim eneshenesh eshudok douk shetem okwudok buk iri nakri, “Adur atin, eik douk hurukatin um inaku!”

Adur, Debeini Jisas, nyak nyunaki!

²¹ Aria eik yakri Debeini Jisas nini ipak ihish-morim Iruhin ananish arpesh pupe aria nutaurumep meyoh. Adur.

IRUHIN ANANIN BARAEN
The New Testament in the Central dialect of the
Arapesh language of Papua New Guinea
Nupela Testamen long tokples Arapesh long Nuigini
copyright © 2003 Wycliffe Bible Translators, Inc.

Language: Arapesh

Dialect: Central

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-05

PDF generated using Haiola and XeLaTeX on 11 Nov 2022 from source files
dated 9 Oct 2020

2bc22d5b-c527-53fd-8d75-3cc4c2e66cc9